



15


ル 5
3291
9



067.86

138.9





門 5
號 3391
卷 9

增補縣志卷之二十

人物三列傳

湛鳳光 國朝 下同

單私淑

劉嘉彥

陳輝璧

鄭東來

黃性申

呂其瀾

湛宴

鍾文英

梁正

姚蕙 子階及

伍暹

陳世用

伍天長

劉宏學

陳輝宗

早稻田大學圖書館
第30.1.18
藏書

黎祺

鄭枝茂

湯億

子世美

黎翰

趙陽況

子光濃

阮大材

朱家琇

湛夢蛟

姚玉麟

王紹祖

伍星

鄭珍

湯有德

湛祖貴

湛其源

顧大文

單乃級

單乃芄

徐玉東

劉滄

伍大桂

吳乾

賴澄清

黎元祥

鄭子堅

賴容熙

黎泰

吳爲經

王應相

張兆璋

子上柱

駱天驥

林樹儀

王國麟

陳賡年

伍登庸

郭逢源

子朝章

湯羽儀

陳維嶽

弟維祥維潤同族勝扶應登直壯

周沅

賴大授

子有臨

劉揚清

劉元美

熊朝興

劉士元

劉殿揚

王見龍

蔣大權

劉敬榮

潘榕

蕭月恆

劉子鎮

尹承先

劉耿光

劉子培

張文灼

劉熙

張得興

湛恩榮

劉允榮

賴聖揚

何雲章

劉汝濂

列大魁

王浩鏞

陳佐清

劉燮邦

何天珍

陳容達 弟榮舒

劉德輿

吳大邦

尹錫勳

列國光

周從諫

賴鳴球

郭維琛

郭應齡

湯定祥

鄭嗣文

鍾兆清

陳熙泰

陳晃

黎朝傑

吳榮照

國朝

湛鳳光字用喈甘泉先生族孫也幼英敏試輒冠其曹
 教授里中學子皆知名土工七言律當代推重康熙
 癸卯發解闈墨紙貴一時久躋公車謁選授深澤知
 縣深澤為畿南僻邑地瘠民貧向例新令抵任凡一
 切需用悉取給于里社鳳光下車一概揮去列榜於
 通衢永以為例滹沱河春夏泛溢頗害稼鳳光單騎
 詣河濱相度形勢會邑父老議隄之得有秋徵收時
 輕其耗數月而輸將報竣時總督某清廉為天下第
 一深器重之誠各屬有宜做湛深澤之諭方形薦牘

鳳光遽以勞瘁得疾卒搜其篋不足于殮士民爭賻焉鳳光爲人鎮靜溫恭而在官多愷悌之政洵不愧良吏云所著有雙峰詩集

單私淑石灘人自少敏悟補諸生長益務博覽年弱冠中康熙戊午舉人兩上公車不第選江南鳳陽府靈璧縣知縣鳳陽故明太祖豐沛地薄其征民恃此多情廢反致貧瘠私淑至督耕甚力每歲設樽酒於公堂召其上農夫簪花鼓吹以獎勵之自正供以外一切繁費皆罷免不數年桑麻茂密成樂土各市集百貨麇至其低昂貴賤例有一人以主之謂之經紀充

是役者必喪金數十進之官陋習相沿私淑欲除之而未能也則以建東西義學具修脯延師以教其子弟於是文風亦稍稍振焉有貧民鬻其女割俸贖之給配良家江南癸酉鄉試充同考官所得士凡六人皆名宿其居官最廉潔懲奸宄而恤窮黎故邑人有清慎勤之頌前令多以盜去官至是賊黨私相戒曰單公好官勿以我輩事累之也初私淑迎其母就養於官舍二載母年老矣而飲食風土與粵中異不甚習乃遣其妻孥奉母歸卽移牒請終養去之日士民攀留不能得送之百餘里旣歸之後布衣草履往來

畦疇間以課耕爲事或時入城見邑宰輒陳利病以待興除邑先賢祠久傾田產入寺爲寺僧所敗經理之令邑紳士管其出入又倡建義學於碧江涌口倡建十世祖祠續修單氏族譜子八人皆有文名

劉嘉彥塘尾人少尙氣好俠閭里少年皆宗之時尙可喜以平南王鎮粵中橫甚諸亡賴假冒王府人流毒鄉里會縛其父仰周馬上去嘉彥時僅弱冠馳往奪之歸有同門趙生者其族人負王府緡錢不能償王怒移之趙索趙甚急嘉彥挺身見王說之趙得免旣而折節讀書稽古今經世略有得便欣然忘寢食康熙十四年由廣州府學生員援例貢太學棟任潮州府程鄉學訓導次年海寇鄭某臨城懷印綬潛遁不陷賊寇平遂兼攝鎮平平遠二學時兵燹之餘學舍多焚毀嘉彥皆葺之率諸生考鐘伐鼓於其間絃誦聲不絕復手書先哲格言揭廡壁代箴銘躬行倡導一時人才遂以振起及歸諸紳士遮道者數百人勒去思碑馬督學陳公書圭臬三庠以褒之歸乃築室梅庄與諸名輩觴詠林下稱梅埜居士程鄉來省者皆過謁執弟子禮甚恭癸酉榜發省元鶚薦陳君偕同榜七人皆造門致謝而去晚年益好行義修祖塋

會城系志

割田宅以鳩族姓恤鄰鄉之困乏者又里中社學久廢修復之置田以資其膏火所著有梅堃集藏於家陳輝璧字光珮號琢齋曹村人年十七補縣學生二十舉鄉試五赴春官不第謁選授湖廣麻陽知縣癸酉分房所拔皆三楚名士麻民經亂久田土皆荒蕪後稍稍生聚而故籍紛亂有田者以虛糧爲累輝璧下車卽單騎履畝清丈定賦額民賴以甦又憫麻邑科第寥寥出俸金於東門買地一區創義學延名儒以訓其士皆資給膏火士感其德卽義學尸祝焉旣而修 聖廟建銅湘橋於利弊無不悉心興革聽訟若

燭照吏胥不能爲奸蒞麻五年以父母老請假旣終養補北直寧津縣寧津爲衝繁地非麻陽比而輝璧釐剔奸弊教養兼盡一如在麻陽時在任亦五年以註誤被劾歸士民皆攀轅賦詩以送其行後雍正二年輝璧念增邑人才日盛倡邑中紳士請於督學加額三名與大縣比此最有助於邑中者前邑令蔡淑慕之聘修邑志所著有羔雁堂集卒年八十四子宗翰字彩書有才名隨父宦楚有楚遊草

鄭東來字紫函高賢鋪人拔貢生鄭瑯長子年十二著奇穎聲督學使者召之至榻前問讀書幾何年應聲

長城縣志 卷二十一
曰一紀矣曰生卽能學耶對曰夜以繼日耳乃大奇之遂補弟子員試輒冠軍後督學左公亦深相器重食廩餼三十二年充貢太學生平聞主敬之說不冠帶不出戶受學者每望見生嚴憚心素行敦樸不事粉飾邑令冉存異夏熙澤皆重其德望相繼延爲鳴皋書院及瑞山義學山長邑之知名士多出其門立教不沾沾時藝每日學者不身體力行與未學等耳故其詩文樸茂有古色而學問淵博亦無所不該所著有澹寧堂文集詩集

黃性申會仙鋪人別駕黃夢說孫惠州府訓導命申弟

少穎異杜門力學寒夜發篋欲卧則以冷水澆兩足由是博涉羣書究心理窟文慕柳州因自字子厚年十七補弟子員旋餼於庠性申生而美丰儀顧盼自喜嘗以應舉至會城尙藩門下有謂之者曰子瑰偉若是何必斤斤就科目哉少屈節卽州縣之任可立致耳性申曰功名可他途致耶賦詩謝之有文章物命全無力富貴憑人大不應之句人有與其兄命申構隙者欲離其骨肉性申佯領之而託於詠史以自明其意云年甫三十而卒性申嘗與邑人鄭東來釋古雲同闡心性圖說理解精妙其所著皇極經世圖

堪城縣志 卷二十一
解已殘缺僅存十餘簡然其生平苦心好學之概尙
約略可想見近則鮮矣

呂其瀾字淡觀城外東雷鋪人少失怙母趙訓督甚嚴
遂奮志力學無書不讀而尤邃於關閩濂洛之旨弱
冠補縣學生試輒冠軍應康熙辛酉科鄉試薦而未
售同考試官深歎惜之康熙四十三年充貢太學前
後邑令聞其名延爲義學師訓迪不倦及門多掇科
第邑人姚蕙少貧艱於學其瀾委曲成就之後蕙領
鄉薦繪其瀾像於家禮焉邑舉人梁正黎翰熊森皆
出其門其餘知名者指不勝屈其瀾立志勵行動以

古人自期燕處未嘗不衣冠有弟早歿撫其孤如己
子朔望必詣講約所讀法聽者聳動感發又有才略
好爲人策事邑侯有大政必諮之然未嘗以私干詩
文醇正簡古著有東川草堂詩文集長子珣有一溪
文集次子衡有午夢詩集

湛宴字文安號蔚林沙貝人性渾厚與物無忤好學深
思弱冠餼於庠中康熙壬午舉人生平讀書務實學
日尋究其祖文簡心性圖隨處體認天理之旨不事
家人產業安貧樂道教授生徒多知名士癸卯赴選
得直隸永平府遷安縣以年老原職休致鄉飲三登

賓筵邑令王廷鐸題其門曰盛世達尊年九十餘猶能作小楷草書氣骨遒勁有二王法其詩歌文詞皆膾炙人口所著有蔚林稿

鍾文英字修伍號蘭臺甘泉西洲村人年二十一爲縣學生三十一舉鄉試第六授浙江龍泉縣知縣龍山僻田土多荒蕪文英至卽以勸農爲首務其欲開墾而無力者捐金助牛種土貧不能讀書則爲之謀膏火其自守甚介而爲政務克己引咎以德化民一時愛戴僅三載以艱解任貧甚不能歸遂留龍終制每日不自給其士民相率餽束薪斗米藉之供朝夕故

其留別父老詩有二云鹽菜缺時供旅膳米薪斷處續炊煙皆實錄也服闋補授井陘縣井陘民俗强悍無遜讓之意文英爲之辨等威定品制一示之以禮暇時則修邑志以審其風土人情之變時縣數被水旱且患虎文英爲文禱於神輒應縣境爲山陝之交使節絡繹柏井一驛路遠而險人馬往往多困斃文英屢請於上官設腰站未獲舉行後擢授中書文英慨然曰吾今乃得以所欲言入告矣 朝考進劄遂條柏井事宜奏之在中書勤於給事知無不言內閣諸老咸重之稱其諤諤云未兩年卒文英歷官中外計

十四年公餘每吟咏以見志所著有閩越遊詩草燕堂詩草晦叟詩集并陘集藏於家

梁正字貞木接龍舖人事父至孝補諸生後中康熙甲午舉人性耿介廉潔自守增前後諸邑令邵周陳鹿魏皆禮重之延之掌義學教乾隆二年任四川嘉定府威遠縣携襍被以行下車卽詢民疾苦盡出俸金以賑貧匱其俗多強娶正爲之設官媒正婚禮教化大興地多旱田教民製桔槔挽水資灌溉民享其利上丁釋奠前制多缺畧正乃備物敬謹以隆祀典乾隆五年年老乞休致歸卒之日家無餘資遠近皆爲

嘆息

姚蕙字蘭仲儒林舖人文林郎文信子也生而魁梧奇偉呂其瀾見而器之因授以學補諸生督學左公歲試拔第一遂選拔入太學中癸巳舉人以親老不赴選講學於家授徒數百人門下多知名士三子皆有文名長昌及次錫及並縣學生其季子階及最著階及字升吉讀書十行並下弱冠有文名餼諸生中一時名士鮮出其右者辛丑江南惠士奇督學於粵得階及牘大器之謂爲南中之秀由是每出一藝輒爭鈔之相傳誦五列冠軍嶺表無不知有姚階及者

應丙辰戊午鄉試皆在乙榜銅陵陳公聘之主惠陽書院授徒數百餘人又何公夢篆聘之主錦田書院從遊之衆如惠陽時邑中諸生請於邑令蔣敬延之歸乃設講席於鳴皋及瑞山兩義學敷陳經義皆不沿俗說有心解其詩文古氣磅礴故騷雅之士多請謁焉雍正八年邑令鹿後村聘其父子同修邑志未刻行雖畧近繁蕪然鉤考年月甚得志法今修志恒取資焉

伍暹字熊叶號耐園沙貝人補縣學生充雍正六年歲貢暹涵養深遂生平不接冠蓋不濫交遊究心程朱以歛華就實爲本行文亦古茂自喜屢試冠其曹厯掌甘泉丹山三鄉西河各書院教其立教也必先德行後文學學者翕然宗之乾隆八年任陽江學訓導捐俸修學宮訓飭士子諄諄不倦有單寒者令之就其署讀書資以膏火而貧甚者并爲之謀衣食陽江故僻邑乾隆甲子科榜發得三人焉則其教之所開也居官敝衣糲食謝絕諸生儀幣雅好吟咏精古律法公餘則賦詩遣興有耐園稿人爭誦之乾隆十年卒於官其長子廩生大桂及孫庠生又謙扶櫬東歸宦橐蕭然陽江諸生贐賻營奠者絡繹於路

陳世用字穆周號茂園西洲人少勤學好問有文名年二十一補弟子員隨餼於庠以年貢於太學世用爲文一準先正不喜浮靡家貧資脩脯供菽水其外舅割田二十餘畝予其妻俗謂之奩田其後內弟日益貧世用慨然曰吾硯田可耕而彼無之將何以自策乎則盡還之乾隆十三年任陸豐學訓導課士興學割俸以資諸生之貧者卒於任扶櫬還里行橐蕭然道中贈薪水者不絕所著有字畫正蒙雖間雜土音略於訓義未究小學之奧然以鍼砭時俗最有功伍天長字昂出號衢菴沙貝村人邑廩生試輒冠軍雍正九年充歲貢天長性孝友奉庭訓與兄同治舉子業爲文醇正立品端方嚴厲而接人如光風霽月故學者多敬慕之其敎家規矩嚴肅邑令魏綰推爲鄉正鄉黨共矜式焉嘗謂子弟若輕薄浮露則本之不正縱復俊敏亦何足取故其二子在膠序中皆循循守法度所著有四書纂輯衢菴詩集

劉宏學字浩然號梅圃麻車人雍正癸卯科舉人幼學時以家貧嘗爲小經紀且賈且讀學卒有成初次罷公車卽淡意仕進隱居敎授以德化人被舉爲約正時恆集其族人而訓之曰鄉里貴和睦慎毋以衆暴

寡以強凌弱也由是子弟守法鄰里鄉黨間數十年來未嘗有乾餽之失者久之銓除至貧不能謁選改授化州學正訓士先行誼而後文藝黜華崇實學風丕變時同官蔣司訓瓊州人也卒於任貧不能歸宏學乃厚賻之以爲僚友倡任滿歸州人士羣賦詩餞別年八十六終於家子凌雲有聲於庠

據采訪冊增

陳輝宗字世光號雙江龜峯舖人性愿慈補弟子員隨籛於庠食貧力學究極理窟齋居左右皆錄先儒格言以自警爲文下筆洒洒數千言衣冠嚴恪道貌肅然雖有橫逆一見皆色消意沮自愧悔去歷任邑宰

皆延之爲義學師教邑中後進其立教謂文章以寫性情倘性情不端則爲文必支離龐雜學者即使僥倖科第畢竟於身心了無干涉學間之餘閒亦弄筆爲山水花鳥皆能體物盡致雍正庚戌充貢乾隆十年選授肇慶府陽春學訓導以年老不就准原職休致乾隆十一年鄉飲羣議以輝宗齒德並茂公舉爲正賓卒年九十一著有體註訓說鄰鶴亭集

黎祺字融介慶隆舖人黎蘭之子也少穎悟補增廣生博通典籍篤行孝友內外無閒言生平持正不阿而接物溫然不爲疾言遽色鄉曲有相齟者就正於祺

無不愧悔貼服授徒以變化其氣質爲重立論一宗
宋儒遇佳子弟之貧者必親爲訓迪資以衣食每歲
所得脩脯皆以之賙恤貧乏然必婉辭以將之令受
者無愧色秉公嫉邪嘗却暮夜之金護單寒之士邑
令姚仙都謂其廉靜正直爲士林之冠年七十餘自
建達觀閣吟咏其中而質疑就正者屢滿戶外焉
鄭枝茂字可參邑諸生髫齡卽好弄筆墨棘闈屢薦不
售遂淡名途耽吟咏嘗寄居省垣與諸名士結社唱
和名課一時工八分書遠近爭慕士大夫齋壁無枝
茂書者非精舍也性曠達不治生產家徒壁立而冒
次灑然素慕李子長爲人效其貧居百咏中多見道
語得子長風味詩稿累千多散逸自號懶齋年逾八
旬蒼顏白髮長袍赤舄時曳杖赴邑中燕會酒闌燭
跋吐暢音洪有狂士趣人謂李子長可入高士傳若
枝茂其流亞歟

湯億字萬斯龜峯舖人貌魁偉性和而介動循禮法不
干與外事疊掌鳴皋講席教人以實務竭功程邑中
知名士多出其門丙戌大挑授化州學正士有因訟
牒移學直者爲之排解不守卧碑者勸諭令其愧悔
而止遺文稿千餘藏於家弟有德子世美皆舉於鄉

世美文醇才敏好學老而不倦貢後始中式初署臨高訓導繼任新興教諭裁成後學亦有父風

黎翰字屏周慶隆舖人貧而嗜學聞塾中誦讀聲則不去族叔祺異之免其脩脯招就學聰穎異常數年出應童試文宗賞其卷以翰苑許之拔置第一以歲貢登賢書成明通進士授徐聞學教諭有讀書作文癖常以藝事爲多士勸一時文風丕變徐人德之釋篆歸里甄陶後進尤篤著有慎齋文稿藏於家卒年八十餘門人會葬者數百人教澤之廣概可想見

趙陽况字次嵩高車村人邑諸生性慷慨樂施濟粵地

患蠱生母况檢會祖君錫良方捐資送藥存活至千人

乾隆丙午丁未兩歲薦饑頻出粟賑恤鄉鄰藉以無患嘗讓地與族建祠終身不言價值居鄉敦倫飭紀秩如也然持己甚嚴而接物以恕間有橫逆來者謝不與校卒亦無不愧服人咸謂其心化不減薛生云子六人長光濃拔貢官河南通判餘亦先後遊庠食餼季子光蕙嘉慶己卯成進士

光濃字湛華由乾隆己酉拔貢生就職州判歷官河南汝寧叅軍陳州府通判以幹局著篆汝寧時遇水災奉撫軍檄監視賑務悉心區畫哀鴻德之乾隆末

湖北教匪蔓延河南巡撫穆統大軍堵截光濃從軍
尤勤奮有橫草喋血之志撫軍知其練達擬保題適
撫軍調任事遂已修汝寧府志光濃職監刊同僚讌
集唱咏主局方川王太史劇賞光濃詩梓入文藝集
志中旋以父老且病告假回籍抵家甫兩月父卒居
喪毀瘠過甚服闋踰年卒以羸疾不起著有觀光集
遊豫吟燃鬚山房詩稿藏於家子德銓亦遊泮

阮大材字菜園號不問下都神山巷頭人乾隆癸酉拔
貢廷試二等授陽春縣教諭歷署揭陽靈山教諭廉
州府教授調欽州學正五年俸滿陞知縣以父母年

登耄耋不欲遠官借補博羅學所至皆以作人爲務
子懋修邑庠有平副貢

朱家瑋字宗配號丹麓朱村鄉人邑廩生春成之子乾
隆丙辰歲貢生授南雄府學訓導兩署教授兼署樂
昌縣教諭并訓導事生平樸直時慕安閑不聞俗事
然遇事敢爲料事多中鄉里多賴全佑尤健于文一
抵任諸生進謁卽以砥節勵行講學論文爲務微瑕
必摘脩脯不計故後學皆藉裁成己丑春南雄府張
孝泉委之平糶軫恤維均冬復委督修城垣頗著勞
績南人德之至丙申春解組歸里文武同官縉紳先

增城縣志 卷二十一
生及學中諸友咸贈詩章餞行享壽七十有六著有
丹麓文稿子一名華棧入太學孫耀均入太學耀南
耀雄曾孫如陵俱入邑庠

湛夢蛟沙貝人字躍南別字得雨號醒齋少孤貧母楊
氏殷勤畫荻益刻苦發憤領乾隆庚辰 恩科鄉薦
爲人豁達慷慨有幹才所遇盤根錯節游刃立解丙
戌借補河源縣訓導乙巳陞高州府教授勤謹盡職
庚戌授四川資州井研縣知縣甫下車值藏匪擾亂
督憲福統兵勦除委命辦理江達站務時兵餉不敷
蛟爲策畫餉通而民不困上憲重之奏 聞 賜五

品頂戴挂素拖翎出藏後各憲慰勞以天驥空羣扁
贈之藩憲英尤加寵異卽以調署內江縣月餘又值
白蓮教匪猖獗蛟修城池固險要戮力防禦境宇賴
安闔邑紳士送扁顏曰惠普川南年餘返井邑而教
匪仍滋蔓復守禦無恙百姓懽呼送扁曰仁鏡光天
曰冰壺月滿曰咸安仁宇自後政簡刑清士民安乂
上憲屢嘉獎卓異候陞而蛟年已八十餘矣解組榮
歸井研士民莫不扳轅祖餞是蛟之德政固結於士
民者深也丁年筮仕皓首旋鄉而居官廉介歸後裝
橐蕭然終不愧爲清白吏

姚玉麟字應元號愚山少負奇姿長好學秦漢以上之書無不讀善屬文年十九進邑庠二十食餼旋登賢書成進士詩詞顯京師初任四川閬中縣以清慎著同人美其號曰素菴後調授南江縣知縣有某氏謀殺親夫其奸夫岳姓者欲以數千金求脫麟弗受置以法體素羸弱本管道憲某疑其年邁不堪繁劇稟請上憲撤任藩憲英答曰姚知縣是真讀書人外柔內實任事斷推此種不得以其少春風二字小之爲邑令十餘年著政聲布惠澤及解組歸士庶遮道呼父母過閭中亦然歸仍以讀書爲後學訓邑登科第者多出其門

王紹祖字見五慶福棠村人少孤好學事母訓弟俱盡孝友弟亡善撫幼姪其遺資代爲置產已仍安貧領鄉薦借補惠府河源教諭旋以截選知縣授浙紹錢青場大使有舊友遊幕無依援以抵任分甘苦蒞任事未匝三月卒於杭時謝鴻謀爲鹽經歷竭力倡賻乃得歸二子亦有聲於庠

伍星字燦垣別字奎樓資稟聰敏日誦千言襟懷磊落不爲物累少年喪父孝事主母適兄早逝屢讓美產於其姪以順主母之心甫進黌宮卽領鄉薦兩赴春

官不第年二十三歲竟捐館士林深惜之

鄭珍字耀山號待齋高賢舖人少穎悟讀書一日十行通經史百家爲文不屑屑時好乾隆庚子中式亞魁闈墨出衆爭傳誦文名大噪性跣跣不治生產授徒善誘掖邑中出其門者多獲售孝廉李謁聖自少追隨得其緒論英年發達文品兼優人謂師友淵源之益母老事之尤謹晨昏奉侍不敢遠遊登賢書後一試禮闈內艱服闋始再北上嘗謂古人不以三公易養吾何以虛名曠定省爲哉歲乙卯例赴部選座師陳方伯勸令往以病辭惟耽吟咏自娛所著有焚餘

文稿拾餘詩草壯遊詩草藏於家卒年近古稀

湯有德龜峯舖人性孝友莊和未嘗疾言厲色讀書得人十已千之旨受業於兄億後遊粵秀書院馮潛齋評其文廣大精深粹以行世名重一時庚子中式屢赴春官不第授徒於鄉堂課諸生先自構一藝以爲程式生平非公不見邑宰人無敢干以私者其典型至今傳頌不衰

湛祖貴字仁昭沙貝人號東塘生而夙慧長有才名粵秀越華兩院主席咸嘉興之年十六遊膠庠尋食餼中乾隆庚子舉人聯捷進士初任江西永寧縣知縣

增城縣志 卷二十一
調浮梁縣充戊午同考試官歷署定南廳同知永豐
縣事善折獄卓異候陞爲當道所抑未仕時奉父命
倡建泉源書院官浮梁捐俸重修縣城巡撫金奉
旨閱城極加獎賞公餘手不釋卷所著有式古堂文
集紅荔山房詩稿

湛其源字濬之號逢軒沙貝人家貧力學諸生時以淹
博著旋補廩領鄉薦大挑借補惠州歸善縣訓導有
李生慶揚因罣累擬禡其源愛其才挺身力保是年
卽領鄉薦諸生清貧不受贄捐俸修 聖廟暨文昌
廟在任十九年風範端肅年七十餘猶訓士亶亶不

倦爲人口訥居常輒苦期艾至聚徒講學則齒牙清

朗議論風生

顧大文字道載號炳齋石灘人性寧靜寡營幼讀父書
弱冠時鄭督學錄鬢序第一旋餼於庠乙酉選拔北
行遇友人官而窶解囊以助友卒并扶櫬歸里宦遊
十餘載以次選羅定西寧縣教諭課諸生務先德行
資貧乏以膏火屈八秩開三闔邑稱觴後陞府學教
授緣足病遂解組性廉介宦橐蕭然唯數篋圖書以
遺子孫而已

單乃級字寵之號應台岡貝人祖父俱明經少奉庭訓

讀書以遠大自期體魁梧甫弱冠遊於庠乾隆丁酉
膺選拔廷試一等充武英殿校錄叙選直隸分州因
供職勤勞南北風氣不習得脚軟病年三十一卒於
京邸賴陳大斌甄懷仁醵金輿櫬歸其弟乃芄亦舉
於鄉

單乃芄字標之號樸園少力學與兄乃級齊名質羸弱
多病遊孝廉胡璣門青賞之下誠勿攻苦芄曰人非
有爲有守久於世何益由是勵學日進由黌序領鄉
薦三赴春官薦而未售父患酒病常臥床數月不起
芄侍奉無倦容事後母無間弟姪先後遊庠皆賴裁

成力也掌瑞山義學課及門以酒養性情爲要人以
爲務學能得其本

徐玉東字麟章號琅涵西洲人幼聰悟日誦數千言弱
冠鄭文宗拔冠本邑逾年食餼舉於鄉謁選挑二等
借補永安縣學司訓到任卽捐俸倡修學舍著學規
十二條考課諸生童受業者數百人文風益振蒲明
府以名孝廉宰是邑一見東知其有用世才遇事多
就諮同官鄧奇俊卒於任寔甚典衣賻贈并經紀其
喪癸亥俸滿考驗得疾自惠府一日抵家明日遂卒
永邑紳士思其教澤立木主附祀於學之文昌宮著

有遺懷漫草琅函文集藏於家

劉滄字凌洲上都麻車人少英敏家貧父命操農業弗甘也因發奮下帷未冠卽補弟子員旋食餼兄弟在庠互相砥礪兄早喪撫少姪如己子生平敬慎謙和授徒先德行後文藝故門多端士由歲貢厯署永安恩平訓導課士有方在永邑時諸生有劉名載滄獨器之載於是科領鄉薦繼署始興教諭以諸生未工詩日與講貫聲律始諧後署封川學事潘縣令贈聯云講學務崇醇正體居官厯著靜廉名蓋實錄也

伍大桂字月圃沙貝鄉歲貢生雲英之孫歲貢生任陽

江學訓導暹之子也幼承家學書劍兼精年十八以策論補武生十年棄而就文卽食餼其爲文醇古胎息漢京粵秀院長楊某時以大器目之後因父暹終任陽江哀毀過情加以季弟目瞽代籌生計遂淡意名場年七十僅以歲貢選化州學訓導至卽以作人爲己任所得俸金常分惠諸生貧者後學多藉裁成卒於任檢其橐不足於殮子庠生受益與外孫庠生蔡成邦經營扶襯歸里三代明經兩世司鐸士林榮焉所著有秋翠詩草學庸輯要藏於家

吳乾字剛正號廻東石灘人自幼聰慧年二十督學夏

醴谷奇其才志益勵尤爲進士詹良弼蘇兆龍所器
重後食餼其父 恩貢生文中病故未葬三年身臥
柩側慟哭不輟同懷弟亦善讀父書但癖嗜浮圖潛
踪遠道數載搜尋恒不憚跋涉歲貢後司鐸長樂講
學傳經盡歸篤實任兩載而歿子澄源庠生

賴澄清字錦江崇賢都臘團鄉人邑諸生四歲而孤事
母孝年躋七表奉侍色笑無違沈潛力學博涉羣書
尤邃於易乾隆乙酉科易經房洪其哲得卷力薦不
售性淡泊務崇樸黜華其設教先德行而後文藝故
遊其門者濟濟有成至篤宗盟蠲烝租爲房親無後

立嗣者無限族有爭訟多排解歲乙丑制府那奉奉
命掄選賢良方正程明府馮劉兩學博首舉以薦贈
型方善俗額特旌焉年九十卒庭訓尤有方長子文
濟庠生次文龍歲貢任化州司訓

黎元祥字履旋慶隆舖人敦行能文士林雅重以歲貢
欽賜舉人會試 恩賜國子監學正歸而講於家主
鳴皋講席年八十餘猶誘進後學不倦生平誠實溫
恭丰裁峻整望之令人生敬鄉里有爭得言卽解當
事重之旌其閭曰訓俗型方

鄭子堅字白兼號確齋高賢舖人增廣生性孝友素行

謹厚篤志詩書貧益力取與一介不苟接物以和鄉
曲多敬服之其訓子授徒每出語可當箴銘嘗謂其
本不立其文不行及門者多荷裁成學博而數奇不
售嘉慶癸酉 欽賜副貢邑令柏仰其丰範延爲鳴
皋山長邑人咸欽雅望

賴容熙字明照崇賢都臘圃鄉人歲貢生乃附貢莪之
第三子篤實謙和與物無競常以慎言語節飲食銘
於座右性沈潛淹通經籍手不釋卷居家孝友教子
義方凡冠婚喪祭無力者熙必籌畫捐助以成其事
被其惠者至今頌之年近六旬而卒子聖恩有聲於

庠

黎泰字志同慶隆舖人性英敏父諸生連元課之甚勤
四子五經三年通焉教爲文命筆驚絕於是飫以羣
籍名遂著弱冠補諸生第一隨廩於庠嘉慶甲子房
考得卷甚喜亟薦之主司以格奇欲擯不錄房考力
爭列中副車厯掌獅霄瑞山雙鳳等院講席造就門
徒甚衆爲人慷慨剛直勇於任事族中諸務多藉其
言而定家最貧性孝友父沒有弟六妹一撫養婚嫁
各盡其道鄉黨重之著有五經要解交溪文集榕陰
詩草藏於家子鳳池甫弱冠應縣府院試俱冠軍其

淵源有自來矣

吳爲經字緯原號忝兩石灘人附貢承英之子勤學能文偕族侶遊孝廉天祿梁門荷賞識有乾及經舒四家之目首拔鬻宮生平謙和醇樸言行不苟不履公府奉養父母以孝待兄弟以友處鄉族以和歷世先人祠宇墳墓力爲修舉遇饑出貲振濟人多德之尤嚴庭訓子庭桂歲貢庭蕙廩生孫良櫛太學俱能世其家

王應相水東村人遷城南充廣州府學生生平孝友自奉清約願樂善好施予童時執父母喪水漿不入口者五日其至性然也順治丙戌山寇爲亂蹂躪各村堡人死者數十皆具棺衾荷鋪往葬之戊子大饑發廩賑其鄉存活者數十家嘗捐東街古樓豁等處田一十餘畝勒竹坑田七畝于忠孝祠供祭事捐縣前屋三間于六賢祠爲課士之資今亦改以供祭凡春秋二祭祭畢必頒胙于其子孫又捐馬鞍山田二十畝于以文書院嗚呼其高誼有可風者矣

張兆璋字躍珍高埔人年少補弟子員尙氣節慷慨好義高埔當龍從二縣咽喉國初時山寇出沒爲害兆璋捐貲築圍垣護其鄉免蹂躪總鎮劉伯祿剿賊其

地止張氏宗祠俘賊男婦數百瑋惻然爲請之乃得
釋糾鄰里爲食食之榜諸市俾所親攜之去計所活
數百人尙藩之鎮粵也諸無賴隸於旗者橫恣瑋列
其狀白于王王曰生何爲者瑋曰君王以神武定南
陲而臺輿下隸怙勢爲民害毋乃爲盛德累乎王聞
之喜置諸無賴於法自後諸縣得免藩下之害東莞
人張朝紳以事亡命投兆璋舍養八年康熙甲辰乃
出應試成進士有東漢義烈風子上林上柱並歲貢
上柱賦性樸直自號樸齋生平孝友父母病必手進
湯藥衣不解帶父卒有妾石氏鄧氏皆無子老而多
疾上柱事之如所生少與長兄上林相師友終身事
之惟謹事無大小必請命其弟某不善營運家漸落
賣其田上柱贖而還之歲大饑鄉人之無賴者淘淘
羣起欲掠富家上柱諭以義輒止復出穀百石以爲
賑時大吏議建社倉又與兄上林出穀一百石貯之
高埔舊社學久廢學田亦斥賣殆盡上柱向置田數
十畝爲其父供祀事乃割其租之半置之社學具脩
脯曰他日雜誦聲琅琅非我先人之澤乎友人盧甲
貧老無子上柱助之資得置妾後舉一子甲曰使我
餘塊肉者張樸齋也其鄰有葉姓者因亂流散遺田

爲黠佃所踞遂成訟上柱詣縣直之又有林姓者撫賊十餘操刃突入其家皆竄匿不敢動上柱率鄉人持白梃往以大義斥賊賊乃斂刃退與人言無佞諛晚年足跡不入城市有古君子風焉

駱天驥字雲程烏石尾人博學能文早負時名嘉慶辛酉拔貢庚午科舉人生平倜儻有大志見義勇爲創建澄溪書院嘉惠後學嘉慶八年土匪關念宗集黨數千在七嶺坳地方倡亂附者日衆天驥馳報有司親督鄉團導引官兵襲擊斃匪百餘名境賴以安有故人袁麟書之子福早卒遺二子妻郭氏貧苦不能

存活天驥出資置田四畝餘贍之其仗義多類此以公車卒於道人咸惜之

林樹儀字式封號遠羽高桂鋪人優附生嘉譽長子也少失恃事繼母以孝聞性聰慧爲文章跌宕有奇氣每就有司試輒冠其儕偶嘉慶癸酉拔貢中道光丙子科鄉試舉人癸未成進士以卽用知縣分發山西初攝趙城縣事旋銓授滎河知縣滎河故多積案樹儀蒞任數月獄咸理滎河地僻而濬書院向乏師資爲捐廉厚其膏火諸生安意肄業者驟增至四百餘立孝悌品行文藝二等學規察有敦孝勵行者賞逾

常格文化遂以大興所屬歲多蝗爲文禱城隍患以絕尋卒於任樹儀素清廉卒之日宦橐蕭然家人拮据籌措越一年始歸其櫬所著有葵雨遺文拾餘詩稿未梓行子連魁同治五年隨鮑超營赴福建以助捐湖北軍火叙功獎藍翎六品銜嗣從官軍克復文淵州晉五品銜邑城建倉沮廟設冊金局均與襄助成功

王國麟字瑞山賢都蔗埔村人歲貢生任靈山縣學教諭篤信好學至老不倦爲人外柔和而內警敏能任事在縣城營建王氏宗祠事甚艱而維持調護終底

於成邑中建同文義學興文書院秀水書院文見龍社學皆其經營之力爲多人咸稱爲毅士

陳賡年原名綸韜號六舟沙村人武舉瑞彪次子天才卓犖年十三以幼童背默五經補弟子員道光丁酉拔貢朝考授七品小京官簽分戶部四川司行走中已亥預行庚子正科順天鄉試舉人庚子恩科順天鄉試充內簾收掌官俸滿留本部遷主事歷四川司總主稿勦理錢法堂事務遇覃恩父及胞兄慶年皆封朝議大夫尋丁外艱歸服闋回部供職年僅三十卒於官賡年最工書法嘗書順德溫公汝适鄉

賢錄爲時流所推重惟不輕握管故遺墨亦無多焉
伍登庸沙貝人父連芳厯官水師提標前營左部千總
後營守備道光十二年調新寧左營守備是年隨征
八排陣亡奉 旨賜卹襲二代雲騎尉世襲武畧騎
尉罔替登庸生而奇傑狀貌魁梧痛其父歿於王事
常講求孫吳韜畧及戚少保兵書誓爲國家殺賊以
全忠孝道光二十三年由襲職雲騎尉効力期滿署
督標前營守備整頓營伍緝捕勤能地方賴以安靖
累擢至肇慶府參將調赴安徽勦賊迭著戰功加二
品銜 賞戴花翎旋授三江協副將登庸勇敢善戰
膂力過人臨陣則匹馬先登左右馳突如入無人之
境賊每望風驚潰尋歿於陣奉 旨優卹世襲雲騎
尉罔替父子俱爲國捐軀忠孝萃於一門焉

郭逢源字慶霖號澄瀾池嶺人增貢生天姿聰敏博學
能文授徒講學能篤孝友尙節儉以身爲教鄉里有
反是者必嚴詞訓誡人皆敬而畏之福和舊有文會
因事輾轉勢成離析逢源委曲維持文會得以益產
課獎賓興賴無廢墜復倡設西成文會專課詞章之
學鄉僻孤陋於變風雅嘉慶十四年海寇張保擾縣
境知縣柏春遊擊唐文才率兵丁民壯禦之逢源以

家財佐軍事平總督松筠巡撫韓封布政使曾燠會
贈好善不倦匾額卒年七十八遺囑猶以端品行慎
交遊勤正業三語爲訓子六人堯章平章雲章際清
均縣學生瓊章國子生朝章州同銜朝章制行尤肖
逢源道光年間縣多強丐糾黨肆索藉端架陷爲患
鄉閭朝章陳於邑宰懲其首領禍遂息咸豐間縣役
藉催科貽累糧戶朝章亦與陳冠華聯訴大吏得永
蠲積弊事詳陳冠華傳鄉萃英書室傾塌朝章與族
姪錫榮維琛協力建復生平慷慨喜任事而操守廉
正素爲邑令張慶鏢所倚仗事無鉅細悉就諮訪年

八十二卒

湯羽儀字盤奏號雲達鶴嶺舖人附貢生品學純粹孝
友性成年十二居父喪哀毀絕粒旋兄廷奏亦亡羽
儀出則哭兄入則慰母承顏養志數十年如一日母
喪廬墓三年服闋終身御素 顯皇賓天哀詔下爲
位於家朝夕哀哭嘗倡建邑城育嬰堂及置義田皆
施與不少各咸豐初元 詔舉孝廉方正邑令呂應
樞以羽儀薦辭不就四年紅巾之役賊擄縣令倪森
去羽儀時年逾八十忠義奮發親赴西山賊壘翼護
倪令時倪已以抗賊被刎重傷羽儀丐賊舁歸醫藥

及卒爲殮葬如禮羽儀學宗白沙甘泉旁及陽明爲
二業合一之學精易理著有易詳二卷理學粹言四
卷藏於家卒年九十羽儀以歸然靈光學行氣節企
蹤前哲人稱爲高行先生又曰湯孝子光緒己卯縣
令朱雲亭詳請奏 聞奉 頒忠孝流芳匾並 子
建坊旌表崇祀忠義孝弟祠

陳維嶽字崧生橋頭鄉人道光甲辰舉人咸豐壬子進
士授主事簽分刑部陝西司行走觀政三年假歸在
籍適邑中莠民有拜三合會者維嶽恐煽惑日衆滋
蔓難圖屢請當道先事預防咸不之省未幾會匪謝

亞記果糾黨數百劫汀塘村維嶽知勢將燎原乃會
合慶牛賢梅及龍門之麻榨永清等六都設局團練
爲禦賊計四年四月逆首何六在東莞石龍倡亂分
遣賊目朱真社何永康踞增之五踏嶺何維何漢容
踞石灘陳旭踞官海至新塘一帶河面適援增之撫
標兵失利兇燄益張六月初旬賊船駛至石灘上游
縣城震動文武官飛檄徵兵維嶽趣集六都壯勇環
城守禦四晝夜賊聞備稍却旋石龍爲官軍收復何
六敗走匿三江馮學下徐錫恒家地方官不卽嚴捕
賊益肆行無忌分遣逆黨四出招集潰散勢復振縣

對河西山村民潛與賊通七月十四日何六率賊數萬由三江直上巢踞西山村維嶽聞警迅調勇數千十五日與賊戰於河上會大風雷雨我軍不利壯勇死傷百數人十八日賊乘勢攻橋頭村城內奸民開門迎賊城遂陷賊擄知縣倪森至西山巢別而不殺各官均乘間逸城守無人時賊鋒銳甚四出擄掠無敢抗者維嶽忠義憤發與諸生潘榕職員尹承先及各都團紳等裹創再起並招集村農數千曉以大義皆願死戰二十六日何六率衆趨省城留賊八千授賊目葉亞胡梁喜中黎亞魁等屯踞縣城閏七月復傾巢出繞道薄橋頭村時我軍先設伏兩翼夾擊各都壯勇憤前河上之役勇氣彌厲自辰至午呼聲動天地無不一以當百賊不支遂潰連日敗賊於蔣村廖村又敗賊於西門北門賊奔回西山老巢各勇乘勝爭先立將縣城克復而倪令亦因傷竟卒總督葉名琛上其事叙功加維嶽知府銜以直隸州先用賞戴花翎餘各獎叙有差先是承平日久人不知兵自維嶽倡辦鄉團兵威大振凡縣屬之澁村龍潭埔石灘塘尾東西洲紅花地等處證果派潭高灘福和仙村以及龍門之麻榨永清等墟其被賊竄擾及有土

增城縣志 卷二十一
匪竊發者迭經維嶽派勇堵勦境賴以安時洪秀全發難粵西蹂躪徧天下曾文正左文襄諸公均以鄉紳團練收復東南半壁藉其戰功位至將相維嶽以咸豐三年辦團在諸公先尤爲徙薪曲突之人功在不朽乃事平久不謁選倘所謂急流勇退者非耶弟維祥字麟生邑附生維潤字礎生同族勝扶號殿奎應登字亮臣直壯號偉升紅匪之役俱隨維嶽勦賊復城論功維祥獎教職銓授瓊州府教授維潤獎軍功六品援例晉都司銜勝扶委用縣丞獎六品銜賞戴藍翎應登直壯均獎軍功七品

周沅原名榜號蕊宮泮村人負才兀傲不可一世年十七爲諸生卽有志經濟之學咸豐甲寅鄉團收復縣城沅運籌決策與有力焉事平叙功獎訓導尋中同治壬戌補行己未 恩科鄉試舉人時年已六十六矣卒年七十八生平工詩尤喜爲詼諧奇譎之語蓋亦有託而言也

賴大授字監周號任之臘埔人曾祖文發有隱德父上進亦好行方便嘗建橋渡以濟人置烝田以贍族年高九十有四大授質魯好學經史百家之書靡不貫通弱冠卽食餼於庠性尤篤孝友遊學時弃母喪慟

絕仆地後甦自是如有心疾嘗徧尋其母誤社爲墓日號泣於社下服闋乃止鄉人爲之立社亭以存孝跡道光壬午舉於鄉坐主爲祁相國窩藻深器之癸未試禮部報罷南旋時祁公督學湖南順道謁之遂留襄校試卷越一載以親老辭歸嗣是一以教育爲事歷主各邑講席其教人皆先德行而後文藝出其門者多實行士晚主講南山義學以德化人一鄉有廉讓風縣令明達撰誦芬貽穀額贈之咸豐四年紅匪之亂倡各鄉團勇防堵恢復善後概不居功力辭保舉尤爲清白自守弟早卒年給租穀二十石以恤

其孤寡卒年七十有八著作頗富惟不存稿本故散佚甚多子有臨有敬皆善繼其志有臨號月樵道光丙午副貢有父風以三弟有敬聰穎絕倫父篤愛之嘗得厲疾禱以身代精誠感格弟疾遂瘳嘗爲鄰人毆傷頭顱大動衆憤幾釀械鬪有臨竟以一言止之人皆稱其雅量咸豐之亂佐父倡聯約團勇以衛桑梓境賴以安因名其約曰聯平永遺約烝以備防禦時值軍興賦重有臨念邑內民力已竭請諸有司得邀蠲免尤有知人之鑒嘗薦東莞賴鎮海鎮邊兄弟於提督賴天爵後皆游歷提鎮先後長官咸器重之

增城縣志 卷二十一
張令星耀尤爲倚仗時建南屏書院令董其事以其能潔已奉公也卒年六十八子天恩亦能以文行世其家

劉揚清號臨川麻車人超達孫少英敏由歲貢銓授廉州府學訓導到任卽銳意興學有學生以微事被逮頗有株連縣令藉獄圖賄欲陷之牒揚清先褫革其衣衿以爲用刑地揚清知非其罪持之堅威逼利啗不爲動卒白其寃而出之獄在廉踰十年兼攝教授篆者再裁成甚廣解職歸凡敬宗收族各義舉尤力爲肩任一鄉翕然卒年七十子莖露莖芝俱邑諸生

劉元美號慕堂麻車人少與邑人林樹儀趙光蕙南海黃其表番禺陳廷輔等十二人爲文社久負時名以廩膳生援例授教職尋攝乳源縣學教諭日以劉忠介公人譜等書訓飭士子在乳三年成就甚衆諸生思慕不諼就其所修之文奎樓設長生位祀之逾年攝樂昌教諭翁源教諭課士一如在乳時晚年家居益以培植後進爲己任著有玉峯文集霽月山房詩集子登雲邑廩生孫汝誠濟庚皆邑諸生

熊朝興字辰雲梅都臘田埔人道光戊子武舉任廣東省塘務咸豐甲寅紅匪陷和平縣城朝興奉檄率兵

赴和平四路勦撫旋即克復以功賞戴藍翎遷督標左營左部千總尋擢守備

劉士元號冠三邑附生麻車人少有大志讀書務爲體用具備之學遊庠後設館課徒從遊甚盛其爲教文章與氣節並重出其門者望而知士元弟子也士元爲人性慷慨重然諾而稽古之力過之以漢學持己以晉學待人周旋儔類間凡接其言論丰采者暴戾與弇鄙之氣俱消尤於寡婦孤兒多方扶助晚年嗜菊築五荔園徧闢菊畦日與同志酬唱其間年逾大耋子二長湖海增貢生候選訓導次允秀咸豐辛酉

副貢文章品行稱二難

劉殿揚字對廷例貢生浸木漚人咸豐四年紅匪陷縣城紳士陳維嶽練團勇謀收復兄殿英以助餉復城功獎守備銜殿揚壯年航海至南洋荷蘭屬土之麻釐埠墾地種植積累致富晚年歸里好行其德鄉鄰有貧苦者稱量周恤與兄殿英皆年登大耋怡怡一堂縣令劉光遠以昆仲二難顏其堂鄉里榮之以子紹宗由候選道加級 誥封中議大夫次興枝軍功藍翎五品署增城營永清千總

王見龍號書田白面石人 恩貢幼失怙事母孝六齡

時母患目見龍日夜舌舐母目復明稍長嗜學苦無
資樵牧行坐讀書不輟一日途遇同邑王定璋異之
詢其姓字及家世始知爲故人邑附生愷園幼子乃
招之就學不受脩脯且時助之膳見龍學業定璋實
栽培成之後設館授徒多造就貧乏子弟皆體定璋
意也生平尤篤友愛樂施與每歲所得館穀半以分
奉乃兄戚友有稱貸者力所能無少吝嘗曰以金錢
貽子孫不若以詩書教子孫咸豐中以復城功賞六
品頂戴子鏡溶邑附生

蔣大權號西衡福都二車人性慷慨咸豐四年紅匪亂
因之飢饉大權勉力賑卹鄉中多待其舉火者匪且
張保糾黨數百入境蹂躪大權率子弟數十人會鄉
中丁壯逆擊擒匪六名殲之餘匪他竄境賴以安事
平論功獎六品頂戴

劉敬榮字以莊麻車人歲貢生幼失怙事母以孝聞聰
慧過人弱冠補縣學附生旋食廩餼生平品端學粹
負人師重望先後主獅霄書院講席有年咸豐四年
紅匪陷縣城敬榮與有收復功賞六品頂戴年八十
選英德縣學訓導以年老辭不赴子獅勇邑武生鎮
藩附貢生

潘榕號蔭堂瀾溪人邑附生工楷法家居教讀值咸豐甲寅紅匪陷縣城橋頭白湖各鄉相繼被擾時賊勢方張團紳陳維嶽擬稍避其鋒念瀾溪在萬山中賊蹤未到此地可暫棲乃偕尹承先等乘夜入瀾溪主榕家榕悉心籌畫聯合六都鄉團歃血同盟力圖克復僧明亮在證果墟豎旗誘眾附者甚夥人心惶惶變在旦夕榕偵知趣率鄉團疾馳至殺賊數十立擒明亮斬之搜出從逆姓名冊數本同事欲呈之官榕念脅從皆無知不允執付火以安反側人心大定附近證果數十里皆安堵當事得以從容布置淨掃賊氛者榕斬明亮功也賊平設局辦理善後有以賄爲操縱者榕獨秉至公不爲利動在局與同事意見不合辭返里後選授高州府學訓導在任二十餘年年七十餘卒於任

蕭月恆號道根塘頭人少讀父書善解悟性渾厚不立崖岸道光己亥舉於鄉咸豐四年縣城失陷賊踪四布在籍刑部主事陳維嶽募集上六都義勇扼增江上游月恆亦招練鄉團堵禦東莞石龍東南半壁爲增江下游保障軍聲大振縣城藉以收復旋與陳維嶽襄辦善後削平餘孽總督葉名琛上其功以知縣

歸部選用十年授廣西武宣縣知縣武宣自咸豐六年遭亂都邑爲墟衙署被燬黨首陳開先鋒呂文郁盤踞縣城月恆甫下車設伏白狗灘親督民團間道攻勦賊失備奔竄伏兵齊發擒陳開呂文郁斬之餘匪星散城遂復流寇黃六覃大章等出沒東鄉寨犬吠灘等處蹂躪鄉村月恆復率團總張振威設法擒斬縣屬悉平逾年蔣益澧劉坤一視師潯州持久無功而餉糈困絀乃委月恆募捐軍餉民心愛戴月恆踴躍輸將計得米二十四萬石潯州克復月恆實與有力廣西巡撫劉長佑嘉之保奏以知州補用月恆

任武宣七年承亂離之後民生凋敝而拊循有方武宣民蒙樂利焉年老解組歸教授鄉里主獅霄鳴皋兩書院講席誘掖後進裁成甚廣卒年八十六子松齡訓導孫時杰增生

劉子鎮號鐵崖麻車人邑武生咸豐四年紅匪陷縣城子鎮率義勇與各路鄉團擊賊以收復城池功授千總六年英吉利犯廣州總督葉名琛令子鎮守西水關同治四年三月總督毛鴻賓委解霆營軍火赴漢口大營提督鮑超留之在營差遣隨同大軍由江西回粵會勦餘賊以克復嘉應州城功獎以守備儘先

補用賞戴藍翎六年以勦退湖北永隆河大股捻匪
功擢都司加游擊銜賞換花翎授增城營左營守備
遷肇慶督標前營守備所至安良除暴衆心悅服操
守尤潔年六十卒於官幃帳蕭然賴弁兵賻贈乃得
歸櫬子鴻鈞候選營千總

尹承先字緒延白湖人邑武生光之子也兄弟五人承
先居長天性孝友自幼篤志力學而屢躋名場乃援
例授中書科中書家素饒裕喜施與識大義遇歲大
饑斗米千錢承先運穀數百石往證果墟賑濟存活
甚衆其他贍族恤貧存孤惠寡掩骼施醫諸善事無

不力爲肩任咸豐甲寅七月紅匪屯聚西山次第焚
劫閭里擾及橋頭白湖等鄉乘勢陷縣城賊氛甚熾
在籍刑部主事陳維嶽倡義討賊初孤立寡助念素
與承先厚夜卽其家與謀承先慨然曰今日之事不
患無兵患無餉耳時勢如此何以家爲卽首助千金
爲倡偕維嶽入瀾溪與生員潘榕等舉辦鄉團聯絡
六都紳士推維嶽統帶各率鄉兵會於證果訂盟歃
血力圖克復助餉者亦源源不絕維嶽之得以成功
多承先維持力也事 聞獎軍功六品並戴藍翎咸
豐戊午英吉利圍攻廣州承先復自備糧械募勇數

百往會城助援駐紮東門外每對仗飛彈如雨神色
不變督戰愈力和議告成全隊而返卒年六十餘姪
元照陸豐縣學訓導孫如玉縣學附生

劉耿光字壯藩麻車人性敏好學家素裕而能以節儉
著由附貢生援例就教職銓授吳川訓導旋調高州
府學教授光緒乙酉科 恩賜副貢晚歲家益饒子
孫甚衆年八十五卒於家長子汝蘭邑附生次汝梅
以軍功議敘都司賞戴花翎 誥封二代昭武都尉
次展雲邑廩生次堃孫其淦皆邑附生

劉子培字渭達麻車人縣學附生咸豐四年紅匪之役

闔邑震動在籍刑部主事陳維嶽倡辦鄉團知子培
有膽畧招之至使同尹光照潛往省城乞援兵中途
遇賊賊易子培一書生縱之達省城卽偕光照謁見
總督葉名琛陳收復方畧名琛聽之乃令歸助維嶽
辦賊事平叙功獎卽用訓導咸豐同治間鄉多水災
子培出粟賑濟存活甚衆家有草堂擅溪山之勝暇
則觴詠其間著有嘯塵園詩稿藏於家子鴻恩邑廩
生鴻彪邑武生

張文灼字體明高埔人附貢生援例授訓導家富樂善
縣北門達派潭六十餘里石路慶都社埔約新石橋

梅都泡水橋皆其手建成豐甲寅紅匪擾亂將迫其鄉文灼適病劇猶授其子以禦賊方畧尋卒七月賊圍高埔其子廣融光豔雄勳遵遺囑率族中子弟禦之圍遂解時在籍刑部主事陳維嶽辦鄉團廣融光豔皆襄助其役嗣以克復縣城論功廣融獎軍功六品候選縣丞光豔軍功六品 賞戴藍翎

劉熙字養晦麻車鄉人六齡失怙事母以孝聞少英敏讀書明大義尤嗜左氏春秋由附貢生納資爲教諭攝仁化縣訓導尋銓授河源縣教諭時母已先卒因陳請得以節孝建坊旌表如例咸豐四年歸善盜翟

火姑糾黨數千遙起龍和間擾及河源城陷之日邑宰施禹泉游擊塔明阿皆遇害熙獨立學齋將自殉諸生排闥掖負而出至古雲約石下村和淚濡墨爲文諭各鄉矢忠義圖收復而河源地本貧瘠軍食無措熙慷慨罄資助餉得義勇三千人與賊戰三日失利謀再舉未果賊攻破石下村傷其左臂不知其爲教諭也熙大呼曰我老教官劉熙可取頭去賊聞驚語衆曰此公素尚氣節久爲都人士所重害之恐失人心遂相戒勿犯以去越日傷潰捐軀河人感其忠烈因建祠城中與施邑宰塔游擊同爲崇祀後邑宰

增城縣志 卷二十一 人物三
方中完繕城郭作忠義記勒石祠左

張得興儒林鋪人性勇敢體魁梧初入伍卽充增城左營馬戰兵尋以効力勤奮拔右營外委咸豐三年隨赴安徽堵剿亂匪迭獲勝仗敘功獎以六品賞戴藍翎五年補督標右營左哨二司把總是年克復廬州回營六年到把總任時清遠股匪練四苦等擾四會境得興奉調剿捕十月在威鎮之塘村地方與匪交鋒亡於陣事 聞奉 旨給雲騎世職尉恩騎尉世襲罔替子二長汝琛出嗣由次子汝順承襲

湛恩榮字渭波沙貝人少有大志好講兵法習騎射道光二十八年充督標右營馬兵咸豐初紅巾賊起奮

然曰此大丈夫立功時也負羽從征轉戰廣西兩湖南江浙等省迭獲勝仗克復諸名城十年擢至廣西全州營中軍守備賞換花翎十一年攻破鎮江府東門外京峴各山賊壘九月十月復破賊於甘棠橋馬陵等地方同治元年授湖南沅州協中軍都司以游擊儘先補用十一月補南韶連鎮中軍游擊先是賊踞金陵爲巢穴後被官軍數道圍攻賊日蹙恆思北竄以分我兵力二年僞懷王周逆糾衆竄至句容城外會合丹陽陳逆圖由九狄洲北渡提督馮子

材遣兵扼險分路進攻二月初五日直趨牧馬口沿
村十餘里賊卡林立官軍馳突屹不少動恩榮飛騎
衝敵手殪賊目數名諸軍聞風爭奮無不一以當百
賊遂大敗事 聞得 旨免補叅將以副將儘先補
用加總兵銜旋因江南肅清凱撤回粵四年赴南韶
連游擊任四月擒獲翁源土匪徐洪古等五月討平
霆營叛勇解樂昌仁化之圍六年七年歷署三江口
黃岡等協副將八年辦理潮屬積案授黃岡協副將
並賞給振勇巴圖魯勇號時潮屬土匪蠢動恩榮督
兵進剿立將匪首偽沙隴王鄭誠擒斬解散脅從潮

屬以安十一年奉

旨遇有總兵缺出儘先簡放並

著署理潮州鎮總兵善後事宜恩榮悉心經畫竟以
積勞成疾舊傷復發卒於官督撫臣奏聞 上震悼
贈振威將軍照實缺總兵軍營立功病故例 賜卹
賜祭一壇 賞治喪銀五百兩廕一子以六品廕生
歸部銓選恩榮在金陵大營最久大小數百戰每身
先士卒雖被賊重傷類能裹創再戰轉敗爲勝歷任
統兵大員咸倚重之先後 御賜繡花荷包等物歷
官所至潔已奉公不名一錢故卒之日兵民哀泣靈
柩回籍土人沿途設祭復立廟金山及立祠湘子橋

側祀之

劉允榮字秩尊號仁卿麻車人道光乙未科舉人大挑二等就教職先是北上時有同試南海陳君壯猷途次天津暴疾卒允榮爲之殮殯厝於佛寺及南旋又爲運樞歸其鄉風義動一時道光戊申署四會縣學教諭咸豐四年紅匪之役以復城功保舉知縣後借補陸豐縣訓導加同知銜遷惠州府學教授兼攝歸善縣學教諭以老歸卒年八十六子鼎璠邑增生

賴聖揚號東山湖塘埔人少失怙母梁撫三孤子負薪鬻菜哺養成立稍長侍其祖父汝碧於會城時汝璧

爲按察使署吏胥司出納文牘聖揚因隨之習吏事

法例皆所諳練自汝碧以來好爲鄉里排患難解紛糾聖揚繼之益爲當時推重凡有爭競成就質理得其一言渙然冰釋間有武健不可理喻者或陳之有司必能使直者得申有司皆多所倚重值連州八排猺人犯順按察使李福泰銜命討之以聖揚從至則聖揚躬入猺洞宣諭諸酋猺皆就撫嘉聖揚功獎八品銜咸豐四年紅匪何六反東莞竄擾縣境踞西山村攻陷縣城知縣倪森死之在籍刑部主事陳維嶽辦鄉團聖揚所居村距城近率鄉勇助之遂復縣

城平西山村論功獎六品銜尋筦榷運居韶州去家漸遠然性至孝間歲必歸省其母時母目失明旦夕禱諸天朔望徧禱羣祀歸卽以舌舐之冀復開豁嗣以母年益老遂辭所職歸養年六十六卒于家生五子其少者際熙官翰林院編修值 國慶推恩所生贈通議大夫

何雲章號瑞庭儒林舖人少有勇畧年二十入伍以捕盜出力歷補增城營左右營外委道光丁酉授廣州協左營把總時有莠民拜三合會者雲章恐其滋亂先事預防解散甚衆辛丑英吉利寇擾省城人心惶

恐雲章力爲防護民賴以安乙巳授右營千總己酉

署三水營守備三水地當西北通衢水陸分歧盜賊充斥素稱難治雲章履任後訓兵練勇分路卡緝未及朞年獲要匪三百餘名路途安靜咸豐辛亥擢守備甲寅六月洪秀全發難廣西分遣大股萬人順江東下圍攻三水縣城附省賊黨同時竊發寇警交通外無救援雲章捐廉購礮募勇率其子女濂啟關血戰賊衆敗走追斬餘孽全股蕩平乙卯授廣州協右營守備 賞戴花翎丙辰補羅定協右營都司留辦三水善後事宜是年鄰境清遠四會土匪蜂起奉檄

督軍赴援勦撫兼施閱三月而地方大定丁巳擢潮州鎮中軍游擊潮州民情强悍抗糧拒捕習爲故常適海陽縣屬楓洋鄉匪徒抗糧滋事抗拒官軍雲章奉檄查辦身入匪鄉曉以禍福大憇授首解散脅從民心悅服旋以叅將補用己未庚申洪黨石達開由江西竄陷連和平龍川河源嘉應興寧平遠各州縣雲章督兵進勦屢戰皆捷立將各城克復同治甲子洪黨汪廣洋丁太陽各擁衆數萬由江南敗竄自浙而閩勢將及潮大府命雲章防堵兼攝黃岡協副將汪夥已陷漳州竄據雲霄廳城迫近潮屬雲章激

勵士卒號召圍勇率師進討擒髮逆三千餘名賊不

敢東渡乙丑以副將儘先補用旋以洪黨肅清卸署回任光緒乙亥恭逢 恩詔誥授武功將軍丙子因

病乞休開缺回籍丁丑春病卒年六十九雲章起家行伍戰功卓著捕盜勤能歷任督臣咸倚重之先後蒞潮二十年地方應辦事宜知無不爲軍民愛戴爲建專祠崇祀以誌去思其功德入人之深如此

劉汝濂字愷之號亦宋麻車人家貧苦學博通經籍年二十一舉於鄉旋以大挑授饒平縣學教諭在饒十一年提倡風雅饒人士仰若山斗饒中祀典多訛紊

汝濂爲一一釐正合於通禮會饒平令以軍事他調
汝濂會一攝縣篆尋聞匪破嘉應陷大埔饒亦戒嚴
汝濂建議行徵調法知縣許寶珩聽其言以堵禦事
屬之寇聞不敢犯境賴以安解職歸閒與守土者相
往來言不及私唯事關興利除弊則竭情獻替時縣
紳創設全邑總局推汝濂爲首領然非重務亦不一
至局也性寡嗜惟喜藏書所爲詩古文詞皆雄健摩
窠書效柳河東著有防饒編綺園詩文集子星榆由
附貢生援例叙州判封贈祖父皆如其秩

列大魁號梅卿仙村下境人道光丙午武舉丁未會試

挑取營千總庚戌成進士授衛守備咸豐四年復縣
城叙功奉 旨以外海水師營守備補用賞戴藍翎

王浩鏞號侶笙棠村人承祖父業家頗裕慷慨好義每
遇歲饑輒賤糶其穀以濟鄉里咸豐四年紅匪陷縣
城在籍刑部主事陳維嶽集六都義勇團練討賊浩
鏞罄其家儲蓄以助軍械糧食事平叙功獎縣丞子
琮璜 恩貢生

陳佐清號襄卿馬車排人少讀書明大義旋改習武藝
補縣學武生成豐四年紅匪陷縣城在籍刑部主事
陳維嶽倡辦團練佐清首先應之自籌餉械親督馬

料浪跋振興等約鄉團直搗西山賊巢克復縣城叙
功獎軍功六品事平舉辦善後佐清任證果局務釐
別良歹閭里賴之

劉燮邦字貽徽麻車人由武生援例授千總咸豐四年
紅匪之役率鄉團隨同收復城池論功獎以遇缺卽
補六年英吉利犯廣東率勇守西城撫議定適尙書
羅惇衍河督蘇廷魁太常寺卿龍元禧奉 命在籍
辦鄉團燮邦亦率團勇赴之旋巡撫柏桂調令回籍
勦捕增城從化土匪以功授肇慶左營右哨千總駐
紮封川城封地毘連廣西劇盜出沒有司避就懸案

山積燮邦至悉力捕治全境肅然燮邦志遠大尤喜
讀兵書談韜畧久淹未弁處之泰然也子衍年邑附
生

何天珍字敬堂上都亭子岡人賦性渾厚精明幼時鄰
里老成皆稱贊之及壯業商賈所億屢中遂致巨富
生平樂善好施凡造橋築路諸舉多自出貲無少吝
道光甲辰倡建同文義學尤賴其力咸豐四年紅匪
肆擾天珍預集鄉團數百日給以食聞警卽飭救援
值匪犯上都鄭村約嘗躬冒矢石相與鄰紳吳大邦
所率團勇分途截擊斬匪甚多旋由陳維嶽函約會

同收復縣城論功獎六品銜子漢章同治壬戌補行
己未 恩科武舉孫占鼇咸豐辛酉補行乙卯戊午
科武舉疊封武畧騎尉壽年八十有五卒

陳容達字擴充新街人熙泰伯父也少有遠志道光初
禩中外結互市之約容達卽乘時邁往經商美洲其
時海舶仍多用木質恃帆檣御風而行波濤艱險歷
四月餘始達其境由是貿遷有無旣得風氣之先尤
善奇贏之術經年積累遂至巨富嗣是縣中商旅接
踵繼至者多有厚獲皆藉其鄉導而感其提挈焉暮
年挾資歸享仍設肆于縣之新塘墟益好行其德年

九十六歲卒弟榮舒

榮舒字和溪入粟爲營守備 誥授武德騎尉生平
亦慷慨好施與鄉邑稱善人焉

劉德輿號馨甫麻車人縣附生成豐四年率鄉團協勦
紅匪收復縣城叙功獎訓導尋以預建考棚記功超
委然終未一遇泊如也里居教授惟以啟發後學爲
己任弟德驥增貢生子彤輝邑附生

吳大邦字殿屏隔水龍人父元瑞家富厚而好行其德
曾建新橋三甲水橋二度砌石路數千丈行旅稱便
焉年逾百歲夫婦齊眉同堂五代子孫一百餘人擢

科甲列庠序者二十餘人大邦其第六子也中道光
庚子 恩科武舉性剛直勇敢有爲尤以振興文學
爲己在道光甲辰邑中建同文義學大邦貫始終其
事咸豐四年紅匪之亂大邦與在籍刑部主事陳維
嶽各就其鄉團練互爲聲援閏七月初三日匪首何
六派其黨葉亞胡黎亞魁率千餘匪劫涵塘村大邦
督帶團丁號召鄰衆身爲前驅與匪劇戰至上田心
地方斃賊千數賊遂逃潰乘勢收復縣城獲獎軍功
六品隨與陳維嶽賴聖揚等在縣治設立總局籌辦
善後居恆排難解紛遠近翕服邑令楊先榮嘗撰聯
贈曰雅量今之黃叔度曠懷古有謝東山其見重如
此長子國琛中書科中書次國瑚同知銜 賞戴藍
翎孫逢恩逢勳俱邑武生

尹錫勳號小銘歲貢生白湖人性聰敏博覽羣籍工詩
古文詞持躬尤廉介不苟取與講學城內鳴皋書院
來學頗衆負一時人師重望所居鄉有稅陂一道灌
田數十頃自道光年間圳路久經淤塞錫勳與同族
元照邦憲等設法重濬原田乃復膏腴鄉人德之子
汝琦駿良皆縣學附生

列國光字寶珊仙村下境人同治丁卯武舉辛未成進

士殿試授三等侍衛 賞戴藍翎乾清門行走効力
期滿授直隸提標三屯營燕河路都司在任十餘年
頗著勞勩旋請假回籍卒於家

周從諫號小垣泮村人祖俊彥工詩有逸樵遺稿行世
父熾昌訓導豪邁有幹事才負時望從諫少聰穎年
未弱冠出就有司試輒冠其曹由廩貢生納資授訓
導助建考棚成記功超委尋中光緒壬午科順天鄉
試舉人以襄辦全省團練獎五品藍翎生平幹練勇
敢不畏強禦邑東門外臨江故設有水練館船舶來
往屢受擾累商旅病之從諫爲請於官立革其弊十

四年改建縣學捐設士子進庠冊金皆力助成功士
林德之見全省稅釐奸弊太多徒歸中飽獻議當道
請歸商辦照舊所入公歛另加繳五成謂此法無損
於民有益於國爲理財上策時南皮張文襄公督兩
廣深韙其論亟議施行因格於異議不果

賴鳴球號瑞珊臘埔人讀書通大義納資授通判分發
廣西試用充城段總查值鄉試派文闈外巡咸稱職
旋任平樂釐差攝灌陽縣事蒞任甫數月卓著循聲
一日得家書知母病在牀褥恆呼已名亟欲相見狀
遂請假回籍抵家月餘母竟壽終鳴球哀毀逾度越

數月亦卒

郭維琛字士敏號玉山池嶺鄉人以經商致家小康性剛正喜義俠嘗兩次埽數填納同甲積欠虛糧墊款至三百餘金嗣集同甲糧戶議定先分坊增編一字冠於原甲名首而將所有虛糧名額派撥各坊殷戶肩納從此維琛舊所隸甲乃無虛糧之累復厚待師儒樂育後進鄉有萃英書室日久傾圮爲倡捐重建并集一孔聖會置產出息備常年考課獎賞晚納粟爲州同卒年七十二子三長琦多例貢生工書法性剛直有父風孫榮拔貢 朝考授七品小京官學部

總務司行走遇

國慶

覃恩加級賜贈奉政大夫

郭應齡字耀星號子鶴池嶺人逢源孫也性聰敏少讀書目可數行下年十二卽能屬文聲譽藉甚而屢躋有司試中年始補佾舞生遂絕意科第納資爲縣丞分發貴州試用到卽委幫辦清鎮縣團練事務逾年授威甯州得勝坡巡檢尋調充修理廣順州城幫辦工竣攝廣順州事十二年敘攻克清黃等城連拔堅巢疏通驛路功 賞戴藍翎免補本班以知縣仍留黔省補用光緒元年叙勦平下江叛苗力保危城功賞加知州銜換戴花翎旋攝畢節縣事所至皆能

以文學飭吏治稱循良四年請假回籍遂不復出應
齡性廉介服官十餘年祇一僕相隨歸之日行李蕭
條襍被以外無長物家居後惟杜門讀書授徒講學
二十餘年足跡絕不履城市耄年嗜學尤篤雖嚴霜
沍寒手不釋卷年八十四卒於家

湯定祥號雲谷龜峯舖人世爲縣右族祖成鍾有隱德
定祥偉儀表富膂力自幼讀書明大義不屑爲章句
之學乃棄而習武藝兵法遵 功令爲弓箭刀石之
技挽強命中試輒冠其曹中同治癸酉科武舉光緒
丙子成進士授三等侍衛 賞戴花翎乾清門行走

尋以外艱歸服闋不出家居奉母孝養以終定祥壯
年頗任俠尙氣通籍後折節務爲謙抑彬彬有儒者
風林下賦閒尋常不輕造富道預公私事至於義不
容辭者又未嘗不毅然任之間出爲里閭釋紛排難
張弛均得其宜故人皆翕服無間言年五十二卒於
家子應良以附貢援例授教諭寶堂都司銜 賞戴
藍翎歷任派潭花縣千總

鄭嗣文號慎之新村人父興發以家貧值紅匪之亂隻
身出洋謀生活音問久絕嗣文居家力耕養母境益
窘事畜恆不給奉母命往尋其父見之於南洋小霹

七
憲島止焉乃隨父營工商業積資稍裕歸贍其母霹
憲島屬巫來由種夷轄治草萊初闢政術簡陋受屢
者皆由中土遭離亂流竄而至約束無法遂至分黨
鬪鬪挾械仇殺歷十餘年而不能息時嗣文資望至
深僑民皆倚以爲重思解其紛糾乃親詣星嘉坡謁
英吉利兵帥乞師定亂師壓境鬪輒解英帥罪島酋
撫馭無狀流放他島別立酋而以英國官吏代理其
政治島固饒鑛產而英官復善經營日致興盛英人
嘉嗣文功授以甲必丹職甲必丹者英國武弁銜名
授之使撫僑氓僑氓輯睦由是位望益隆資力益厚

日月積累其富遂冠諸島而性和厚尤樂施與仗義
之聲騰於中外李鴻章督直隸值水災貽書嗣文卽
助以鉅款而歸其善於所親鴻章請於朝以急公好
義表其閩張之洞督兩廣有法越之役嗣文出財贍
軍事 聞得 旨賞二品銜並封贈三代如其秩給
其子錫仁郎中錫聖員外郎本邑籌助士子進庠冊
金建增江書院皆捐助鉅款其他凡遇賑災恤貧修
橋築路諸善舉聞必樂輸輸必優厚不可悉數年七
十三卒於檳榔嶼榮哀之盛夷夏稱之

鍾兆清號香泉熊罷嶺人少讀書務爲有用之學經史

之外旁及諸子兵家醫家之言尤所淹貫家素貧父
璉伯以宿儒講學鄉里年既老兆清復以訓蒙醫藥
資養贍旋又傭書會城值母病得書急歸適颶風夜
作舟覆遇拯仍冒風雨忍飢凍徒步走百餘里抵家
母正彌留卽出其所習醫術療之遂獲瘳自遭是險
益不欲遠客乃就近新塘墟鬻文字爲生活駐新塘
游擊湯騏照慕其品學聘爲記室隨拔充本營稿椽
會巡撫蔣益澧親剿恩平新寧土匪調騏照赴前敵
騏照以百金壽兆清父母徵兆清往助軍務事平以
功獎六品頂戴記名把總同治三年助勦東路閩粵

竄匪克復閩之永安紹安粵之嘉應長樂等州縣城
池論功獎五品藍翎七年提督鄧安邦督辦省河水
陸緝捕以兆清能任爲總文案兼管駕一號巡船嗣
是迭管恬波輪船濟川兵輪緝捕二號巡船屢以捕
獲著匪功先後保薦洊擢記名守備加三品銜光緒
九年九月護解軍火糧餉至廣西邊防統領馮子材
巡撫李秉衡知其嫻戰畧明年檄調至營隨剿越南
法匪師至扣波遇敵前隊卽與接仗克之再捷於關
前坳乘勝逐北出鎮南關攻克文淵州諒山長慶府
觀音橋諸要地俘馘無算器械山積是役也兆清居

中策畫爲多子材嘉之留居軍幕忝與機要爲幕僚所忌不安其職遂密請安邦調回省河緝捕原差迨邊防論功多爲幕僚所抑時南皮張文襄督兩粵知其始末以兆清弱冠從戎前在本省及福建越南關外各地轉戰千里克城破壘迭著戰功幫辦省河緝捕二十餘年所有海洋大盜次第肅清與尋常勞績不同據實入告請破格獎勵免補都司以游擊儘先補用並賞加叅將銜得旨許之時安邦擢潮州鎮總兵卸省河緝捕督辦任兆清前於光緒七年已補授水師前營左哨千總亦卽送回本任分汎東莞莞屬土匪素猖獗兆清至卽次第捕獲著匪李善跳吳全方倫生等三十餘名殲之其罪小而確爲貧病親老所逼者則原之時或給以錢物使之負販而密令老兵伺察舉動再有賭盜犯法則不復赦宥恩威旣洽故其所轄境幾百里無敢爲非者十八年兼管東莞全屬防勇八卡緝捕二十三年授新會營右營守備新會匪盜亦復充斥梁華蟹余裂頭養張亞閏等四出標掠水陸爲梗兆清旣抵任成就捕獲置之於法境始安謐時轄內那伏村教民因建築教堂與南霞社村民構釁幾釀巨變兆清單騎往諭事得寢旋

爲他教民唆聳翻變忝將武永泰親往排解不得要
領仍以兆清往乃就寧息永泰妒其形己之拙也竊
銜之復值永泰請假省墓大府卽命兆清護理其職
益不能平假滿回任從而媒孽其短構之於總督譚
鍾麟鍾麟不察撤其任自謝事家居不復出山惟日
理故業以書卷自娛年六十六終於家著有得情集
爪印軒詩集待梓子家駿瑞年國恩耀南皆効職水
師士傑有聲庠序能繼其志

陳熙泰號萼裳新街人父容秋字節舒號淡川少年經
商香港積資逾百萬能役財以濟物資富以爲善多

隱德尤尊重師儒熙泰善體其志力學成通材經史
以外旁及形家星算諸學靡不淹貫中光緒癸巳
恩科舉人以貲授主事分部銓選性孝友喜施與儉
于自奉而厚於待人飲食服御不殊寒素而凡遇修
橋築路賑饑卹貧贈藥施醫埋齒掩骼勸工興學仗
義急公一切慈善事業皆體其父志力任資助而於
通縣之修 文廟建雁塔及其鄉之築奎樓設書院
捐資尤鉅年五十二歲卒邑人崇祀其父容秋及熙
泰于報功祠旌善祠子念典光緒壬寅補行庚子辛
丑 恩正併科順天鄉試舉人癸卯聯捷進士卽用

知縣改官郎中籤分禮部光祿司行走在鄉捐資數千金創設通邑官立學堂事 聞得 旨賞急公興學字樣建坊亦善承先志者也次念詔候選同知次念誥縣學附生入粟授候選道各以其秩先後封贈容秋熙泰皆光祿大夫

陳晃號辰屏新街人少有大志中年與族兄容秋合資在香港經營商業時海禁初開華洋互市日興月盛晃不避艱險親歷南北美洲及澳洲各地貿易操奇計贏積貲逾百萬縣人賡續而至踵相接皆致富晃實開風氣之先也資業既厚好善尤篤曾捐巨款

助修通縣 文廟設置本族祭田沒祀本縣報功祠旌善祠宜也

黎朝傑號柱助慶隆舖人父兆平家素裕而好行其德凡施濟之事罔不竭盡心力有子九人皆以學行見稱鄉里朝傑其長也伯氏懿康早卒無子以朝傑爲之後然朝傑雖嗣伯氏仍始終侍奉兆平以居迨析產時兆平欲計家財之半畀之朝傑曰同懷九人已不過以齒序當嗣伯豈可因此令一己豐而八弟皆嗇卒析爲九而與諸弟均之辭讓之誼風動一時焉朝傑之天性旣篤而尤邃於學問年弱冠出就有司

試輒弃其曹尋補縣學附生納貲爲教職待銓於家以董修學宮叙功加五品銜居恆喜任事義之所在艱阻勞怨皆不避光緒壬寅年秋收荒歉癸卯春夏之交米價騰躍饑民數千交關於城市知縣敖式標召朝傑謀救濟法朝傑力任平糶宣言於衆衆始散遂與善堂紳董督率子弟履風濤徹晨夕先後運米至百五十餘萬石民賴以贍鄰縣從化博羅猶仰給焉會 朝廷銳意興學朝傑襄助邑令成立高等小學堂隨卽於祖祠建設家族學堂爲通邑先光緒二十九年銓授長樂縣教諭旋移補訓導自庠序之制

壞學官久不以課士爲任科舉再廢師生益復隔閡朝傑力矯之方抵任卽召集諸生講道論學拳拳若父兄之於子弟士亦咸樂依之居職二年以親老歸養去之日祖餞東門者空校而至歸三年父卒哀毀逾度越五日亦卒

據行狀墓表

吳榮照原名焱號南臺石灘人少喪父事母以孝聞而天姿聰穎篤學能文弱冠餼於庠光緒己卯領鄉薦已丑以大挑二等選教職署翁源縣訓導儋州訓導尋銓授高明縣教諭先後司鐸十餘年造就後學勉盡人師之責醇樸寡言淡泊仕進終其身皆以講學

課士為職業而挈經之餘旁及醫學療疾時有奇效
 嘗綜究醫家諸書叅以己見編成拯世錦囊一帙珍
 而藏之以為家傳秘鑰晚年解職家居創設石灘崇
 實初等小學堂旋充本縣官立高等小學堂長堂規
 多其整頓年六十五卒於家著有椰陰寄筆梓行弟
 榮熙廩貢生子煥彬咸世其醫學

增城縣志卷之二十一終

增城縣志卷之二十一

人物四 孝友

韓經 宋

單仲昇 元

蔣亞奴 明 下同

黃棣

李聰

湛羅樵

鄭漢昇

鄭元和 單綱 湛德溥 王夢鳳

王惟賢

吳世淇

盧翼

姚嶢 國朝 下同

葉友文

葉逢遇

張朝璋

馮天載

馮雅玉

黃合宮

吳錫貴

郭德建

劉張牛 壯圖

郭汝舟

曾亞金

尹宗遠

王業光

弟萃光

李廣生

弟麟常

劉文湘

宋

韓經韓塘人父早喪與弟緯力田養母孝友著聞母喪哀毀踰禮親凶功治塋於葛岡山結廬於墓左而穴其壙道出入夜則入壙中抱母櫬宿及旦出就廬舍事耕作食饘粥斷五味不進鹽酪者二年然後歸世稱韓孝子一日風雨晝暝宅中飛錢數萬人以為孝感云

元

單仲昇石灘人父喪與兄仲宗守苦次皆如禮事母內外修飾供養甚篤至大戊申母卒葬藍山結廬墓側

三年蔬食飲水不問家業行省以孝廉辟仲昇辭謝不赴

明

蔣亞奴蔣村人三歲父喪家貧不能學母口授以孝順事實一一皆記憶每旦出採薪賣於市給菽水雖食貧於身而視其母無不豫之色年五十餘母卒亞奴哭仆地絕久之始蘇及葬廬墓三年好事者疑其偽一夕有盜驚其廬亞奴急奔墳上伏而哭曰母無恐奴在此矣頃之一虎突出盜奔去自是人皆信焉

黃棣田美人鄰有爲盜者有司捕之亡匿乃執棣之兄棣時棣無子棣泣曰此行必無生理吾兄世嫡不可以無後棣死可也遂請於捕者願代棣往遂釋棣而執棣赴官官不爲辨竟死獄中後兄果有子

李聰字子奇少穎悟讀書識大義事親至孝內外稱之無間言天順甲申廣西流賊犯境聰父伯昭在西林別墅爲賊所執聰聞急哀家產盡所有得百餘金徑入賊中贖父父得歸而聰爲他賊所殺聞者傷之湛羅樵字邦寵賦性孝友與人和厚事母孝母病痺不能動履者二十年羅樵負之出入手進飲食母卒廬墓嘗於路得金八十鎰知爲叔母陳氏所遺者悉以

還之陳割其半畀羅樵羅樵不受丙申以所藏穀賑
饑人高其義

鄭漢昇執喪盡禮泣血三年不入私室不赴讌會縣令
冠帶延之賓位御史王公表其門曰褒崇孝德

鄭元和單綱王夢鳳皆居喪哀毀盡禮爲里族所推縣
令已前後旌其門又有湛德溥者字周叔沙貝人父
君綽患蠱藥餌弗效夢有人指其股謂之曰此物可
療遂割其右股作羹以進縣令亦旌其門

王惟賢字灼非石頭涌尾人好行其德尤以孝友著稱
兄子爵封以非罪被繫時繫獄者多沉滯惟賢恐事
不能遽白請於官曰吾兄止一子其誰爲後惟賢請
代之及代之而當事者竟不爲辨繫一十七年始得
釋後生二子與其兄子皆子孫繁衍人以爲盛德之
報云侍郎王應華贈之以詩年幾百歲

吳世淇石灘人事親色養備至母病理藥餌侍奉數年
未嘗懈年二十六鼓盆有子矣誓不再娶得年七十
有五人皆以孝稱之

以上仍舊志

盧翼字子州號楚南龍田人性孝友父母喪俱廬墓三
年未嘗見齒幼弟六人咸教誨而婚娶之弟巽登永
樂辛卯科鄉薦祭酒陳公璉旌其廬曰孝友堂

據采訪冊

頂戴

葉逢遇字際亨南門外下街人孝友敦篤事親先意承志左右就養居喪毀瘠骨立既終喪乃建祠奉木主寄遐慕焉兄故磊落不善治生析簪時多予之田二十畝器物之美者亦讓之兄卒撫兄子如己子有叔絕嗣無後逢遇割田宅爲之立後弱冠補弟子員赴鄉試十餘次薦而不售逢遇處之泰然而行誼日益篤居恒犯而不校有盜其物者笑而贖之精日者學邑人有井竈細事輒造請逢遇從容占決必盡心焉邑侯鹿以其長厚推爲社倉副出納皆不苟侯愈重之好學勤修几席常書格言以自儆丙辰舉孝廉有司欲以逢遇應詔逢遇力辭有謙謙君子之風

張朝璋仙塘人氣度凝重而至性敦篤事其親必日侍左右未嘗頃刻離也及父母相繼歿哭泣盡哀幾喪明有幼弟爲賊所擄朝璋冒死從之不忍舍賊憐而釋之爲文質直古樸學使鄧取遺卷青其襟寄之學以需後試生平以節操自持訓飭鄉族置書田以風勵之後生皆蒸蒸起子非熊孫以蕃俱補邑庠生年九十八邑令張爲之請給八品冠帶

馮天載馮村人字跨巔邑庠生少孤性至孝母卒爲茆

增城縣志 卷二十一
舍居墓左五年每遇疾風暴雨必繞墓悲哀聞者皆
酸楚常有盜夜至其廬天載念其寒與之米使作食
盜曰吾等倖一飽願使孝子絕糧耶皆不肯食各抱
一束薪置爨下乃去初其鄉阻市甚遠母在時徒走
數十里赴新塘白石買少許肉供母母死絕不食肉
至是鄉人毀其舍掖之歸以肉進天載泣曰母在不
得常肉食今母往矣雖欲食其下咽乎以哀毀多哭
泣故兩日常昏昧不能書闔邑紳士嘗具呈當事未
獲旌表學博梁君鳳來有詩以傳其事

馮雅玉上都馮壘下人六歲喪父事母能盡孝承歡菽

水朝夕無怠母終哀毀踰禮親凶功廬墓二年或遇
颶風走砂石拔樹幾盡而母墓無恙若有祥雲覆於
其上者人皆見之以爲孝感乾隆三年知縣王廷鐸
具詳請旌

黃合宮字政林南門寺前街人邑庠生雄畧長子學本
庭訓文行俱優有乃父風性剛而勇於義時以強力
肅敬四字銘座右曰此吾韋絃之佩也弱冠補弟子員
戒同母弟曰承歡敬養三公不易敢急微名而遠離
乎然親老家貧無甘旨亦難言孝矣弟灌園我舌耕
可也勿以母非己出子職稍愆致傷父心歲資館穀

於外其弟在家因母詬責自縊其父疑後妻苛逼鳴官出之合宮聞變奔歸泣訴父曰苟弟得罪而死是我之不能教弟以得親若無罪而死亦我之不能順親以全弟母何尤焉矧母所出者尙有二人母去而三子單矣父不允所請遂匍叩於邑之老成代陳於官邑令憐而許留之後合宮未三十而卒遺子女三人母感泣而慈愛之其妻鄧氏食貧孀守撫孤成立其母周全保護之力多也孫大觀邑庠曾孫良貴副榜

吳錫貴綏福都大坦人素行孝友居喪哀毀骨立力貧

鞠育四弟教家秩然有規矩年九十邑令張請於上授八品冠帶顏其堂曰長年人瑞子錦國學生能體父之教謙謹敦睦以義方傳其家孫呈祥邑廩生亦有行誼鄉閭式化皆錫貴所貽也 以上仍舊志

郭德建官塘人父喪廬墓三年服闋垂髮披面族人幾不相識妻竊笑之以爲褻慢復回墓再守三月

劉張牛字燦西麻車人性至孝家貧以鬻薪備甘旨父年老無事喜嬉游日費錢數十念牛貧恐爲累輒自歛約張牛窺父志故作充羸狀夜伺父寢納錢於其囊中一日持斧入山采樵行數里奔回人訝其遽則

以因事遺忘未奉親以嬉游費也其竭力承歡大率類此時有同鄉名壯圖者親年九十餘與同寢處抑搔澣漱必自躬親家人請替弗許遠近稱純孝焉郭汝舟雲都朱村人性篤孝母病嘗割股和藥以進母病立愈平日問安視膳朝夕無間惜先其母而卒同時有柑園村曾亞金者亦嘗斷指調藥醫母母歿號泣欲絕廬墓三年與汝舟俱以孝著

尹宗遠白湖人天性純孝少傭爲人牧每週年節食有肉輒舍精取肥以菜葉裹而懷之主人怪問故曰家貧無肉將歸奉母嘗甘也傭處距家不遠日則求牧與芻夜則歸種菜以供母及長佃田自耕不離膝下適歲大水壞廬舍甚多各家穀種皆沒惟宗遠住屋獨存鄉人向多賃耕祖遺祭田至是以乏穀種故多束手宗遠乃廉值賃耕數十畝歲豐而穀復騰貴一載竟獲千金由此致富至今子孫繁盛冠其鄉焉

王業光棠村人少讀書未冠失怙家貧改習商賈多能億中生平善體母氏愛憐少子之心撫字弱弟萃光教養成立乃弟亦感其友道克恭厥兄怡怡一堂子姪婚嫁已畢猶不忍析爨分居年八十四時萃光病卒臨之大哭氣絕者再有勸之節慟則曰安得他世

爲兄弟乎旁觀爲之隕涕追遠之念尤爲誠篤有祖
祠將圯先自出資倡修又捐田爲祖父祭產鄉之人
咸器重之子遇賢姪鴻基均邑附生

李廣生梅都三子車人性沈靜幼入學塾就傅舉止獨
異羣童稍長讀書每至三言孝章句輒往復循誦深有
體會人早奇之及居母喪廬墓三年不薙髮不茹葷
蓬首垢面竟日焚香哭泣常有鉅蛇猛獸及諸怪異
物見於墓旁廣生不之懼益起敬孝三年旣滿族鄰
迎之返廣生匍匐歸家乃遵禮除喪服內外皆稱爲
孝子事聞於 朝奉 旨以孝弟流芳表其門崇祀

縣孝弟祠弟麟常於廣生廬墓時亦二年寢苦枕塊
終身不御酒肉其妹年十六適斗岡湯姓合卺之翌
日卽喪夫守節至八十餘歲乃卒孝友貞節同出一
門焉同時有劉文湘字波生瑤前面人與廣生素相
友善居母喪亦苦塊三年日夕爲孺子嘑足未嘗一
履戶外蓋亦有所觀感而成也

增城縣志卷之二十一終

增城縣志卷之二十二

人物五 隱德

陳燦 明 下同

湛江 子瑛

黎明

盧國信

湛德沛

林光

周瑞

吳廷講

何善政 弟善述

吳本

徐勤

黃夢尹

吳謙

吳效伊

何統

何惟明

曾可化

鄭文炳

趙仁夫

何士舉

賴與愷

盧應奎

王就

湛恭先

吳效聖

黎臨惠

吳守英

弟世英

梁勝任

湛功武

孫廣德

黃翼朱

鄭大任

湯際可

黃亢宗

黎會禮

單養正

徐應德

劉璲

陳培雲

環江

湯衡

黃雄畧

國朝

下同

劉必振

鄭璇

黎燮五

單光耀

湛上濟

吳驥

劉超達

單尙

張麟

黃鶴鳴

兄繩憲

林浦珠

劉發祿

賴怡

劉世隆

梁顯仁

陳宏亮

陳文渠

劉元伯

賴忠國

陳冠華

湯成鍾

馬明德

潘嘉謨

賴廷幹

朱應時

朱迎

朱容魏

劉纘光

王獻書

黎斗貴

賴鳳

潘學古

劉榮光

陳恭

劉聲揚

陳貫經 子見龍

劉佩蓉

何纘龍

王兆熊

朱秉庸

劉秉寬

明

陳燦字璧光石灘人事繼母至孝事兄長唯諾惟謹如
事父然年十六遊京師歸而力學益充粹以私財建
祠修譜講敦睦之道族中諸子弟化之皆循循守家
法鄉鄰有閔者不求直於官而求直於燦燦片言折
之卽壓服時朝命辟賢有司籍其名以應燦力辭窗
置一琴嘗撫而弄之曰今將舍此琴之適而磨精耗
神碌碌案牘間吾弗爲之矣遂自號琴窗所著有琴
窗集及藍溪詠藏於家

湛江字宗遠沙貝人義士懷德孫性厭囂雜好靜謙約

自守與物無忤嘗力田岡下藝桑數百株以供母有餘卽以濟人年穀稍歉卽出園中所貯者貸其鄰里約豐年償之不計息如是以爲常鄉人賴之無菜色者暇則礪斧斤入山樵採因自號曰樵林子瑛

瑛方嚴介直刻行砥俗不輕假人辭色有過輒面叱雖過當弗恤也嘗留宿別寓鄰有少艾穴墻隙窺其寢所瑛厲聲呵之婦忸而走爲里正時有縣簿作威福爲民害懦怯者畏其威退避惟恐後獨瑛與抗簿固已啣之矣會同邑猾吏余忠子爲盜瑛又列其狀白於官官撲殺之忠遂與簿深相結共仇瑛以閔人

瑛名他獄中誣以罪瑛憤恨得病卒瑛生平好排難解紛扶孤弱抑頑梗人以此多之然竟由是得禍後江以孫若水貴瑛以子貴俱贈禮部尙書

黎明字孟昭慶隆舖人博學善聲詩於世味無所好言動必中矩度雖中夜起必深衣博帶出入里中里中人有不冠者皆走避匿不敢見家法最嚴家之子姪或不嫻教訓無論少長卽召至庭中長跪予夏楚不姑息時築城建學衆務並舉檄鄉耆之明達諳練者董其事首及明明不辭程功庀材手簿籍不輟迄有成效少子皓經歷南昌得請移檄本省給半俸以養

其父亦盛典也皓陞知縣自有傳

盧國信字文信憲使綸冢嗣也無執禪氣習託志閑達有靖節風嘗於飛泉洞口築庄遍植花卉嘯傲其中不聞戶外事隣里有窶者輒袖米遺之子應科領嘉靖戊午科鄉薦

湛德沛文簡從孫年十七爲諸生雅意好古處家以孝友聞樂善好施子絕意仕進優游村墅間足跡不至縣庭閭里推爲名德

林光性愿慤事母甚謹兄元允並領鄉薦入官光語人曰吾無二兄祿養之厚獨以善養耳母卒哭甚哀營葬尤勤及子以良亦領薦爲名刺史君子曰善養之報也

周瑞稟性寬厚饒於財不爲己私嘗建三橋便行旅病者乞藥死者乞棺瑞皆應之無倦色其門如市後子孫蕃衍人以爲瑞之積德宜有是報云

吳廷講字惟沃雅瑤人尙義好施嘗出穀賑饑御史梅某旌其門曰崇義又市得古成之故址因出貲爲之建祠人皆義之

何善政何善述兄弟二人修行人皆慕之政年九十九述年八十八又有張彬伍塗張斌梁琮皆一時樂善

人也

按舊志在明有吳光顧壬孫顧立孫顧濟張悟道李壽顧中興李惟佑鄭元善湯際可鄭敏秀黎文德廖丕承黎三奇湯任李世爵張明真鄭大任吳懋思周宗秀李四成何士錦二十一人 國朝有陳扶搖葉青萬顧伯瑛單文賓潘湛日李子傳鄭展叔曾液金湯麟國黎循堯張猗鄭崇修姚文升黎異乎陳國石十五人皆督理修學有勞焉附記 其名于此其中惟鄭大任自有傳

吳本字復初世居瑤溪里疎於財歲歉勤賑恤又割地為義阡以瘞暴骨隱居三星石之左築亭亭外種柳樹五自娛湛文簡嘗偕御史洪垣過訪垣顏其亭曰五柳亭并贈之詩曰清風傳泰伯高節擬陶潛

徐勤西洲人資性樸茂怡情山水間不求聞達得年一

百有五歲時稱人瑞

黃夢尹字任甫隔濠人貧而有守補庠生願終養工五七律好植花卉繁英滿堦生平與物無競為士論所推重壽九十有六

吳謙龍地人性至孝少孤執喪哀毀日篝燈讀書淹貫經史而未嘗涉名場角聲利一日道上得遺金伺其人還之其人曰請以其半污子矣謙笑曰吾即不五月披裘乃辭十萬而受萬乎嘗遊西粵田州士官某延之為子師有士目章添櫻士官怒一家十八口將被戮謙以理論士官士官改容謝遂不殺也添既免

曰微吳先生不及此謝之金不受生平恬淡自適惟
整家法訓諸子叔子綱中麟經第一人令劇邑以清
白著歸休不治生產鄉人皆曰綱賢然以此益賢謙
吳效伊字任夫石灘人母病延醫問湯藥寢食俱廢居
憂時孺子泣不絕聲好讀書習舉子業而未嘗應試
喜吟咏每與詩人遊逾月忘返所著有家藏稿人多
誦之

何統字承之小樓村人富而好施周恤宗黨始終不倦
隱居讀書不樂就試喜植蓮客因題其廬曰蓮所
何惟明接龍舖人真實樸茂不尚虛文至老好攻舉子
業不衰爲士林所重

曾可化槎岡人性簡靜雅好聲詩有所作人爭誦焉閑
從一二鄉先生結詩社每遇佳山水褰裳先之吟咏
輒竟日歸卽杜門訓子非其義一介弗取邑中建南
山塔規畫居多知府洪有助羅致賓筵年九十卒邑
令謝士章爲文臨喪次哭之復誌其墓仲子受益領
鄉薦爲寧德令

鄭文炳字孔熙聰老裔孫也事親以孝謹聞生平篤於
古道能睦宗黨恤鄉里有叔貧甚割其產贍之歲饑
出囷中粟爲糜粥以食道路之飢者署縣通判陳堯

典舉鄉飲禮延之執醕饋焉年八十有四卒子四次
夢龍有武功次士奎補庠生次士璧歲貢生諸孫亦
多賢才能自豎克世其家

趙仁夫沙貝人事父母最孝朝夕手治飴蜜滌瀨親饋
食中夜必起問安否年已七十矣父憐其老命其子
代之然仁夫不躬親不樂也有戚屬以事至與之同
卧竊其金數十笏以去沒齒不言尤好行陰德所爲
善事不多令人知也邑令陸世科嘗爲文旌之

何士舉接龍舖人和易謙退羣從子弟一範之以禮尤
好急人之急精岐黃書嘗負藥籠周行墟落間有病
者乞治出籠中藥予之不受值築室大龍江環植諸
名花未嘗涉世途若唯恐免之者錢邑令舉憲乞之
典甚隆禮焉卒年九十有二

賴與愷字貽可腊埔村人貌古而行方貧弱者多賴之
以濟里中以細故相訾嗽與愷至輒已先人祠墓皆
竭力營葺性尤溫厚有犯而不校之風鄉閭稱爲長
者邑令丁衍仁以鄉飲酒禮賓之乞言焉耳九十而
卒未嘗有一紙及公門

盧應奎字少燦沙貝人見里中有貧窶者輒咨嗟不已
寒者衣之飢者食之無倦意有族姪少孤應奎撫之

增城縣志 卷二十二
如所生及長爲婚娶延師訓迪得以有成子崇雅亦克承父志丙申發廩賑饑存活甚衆事母曲盡子職每食必親供匕箸及母亡號慟無時竟以毀故得病而卒人稱其孝推官孫襄志其墓焉

王就字仕賢叔父千應貢入京師以就自隨無何千邁疾邸舍就理醫藥寒夜未嘗解衣帶及卒扶襯南歸生平好賢若渴遇不肖者則優容之不爲峭厲以子三奇贈建昌推官

湛恭先文簡之孫少瑰奇尙氣節雄視諸生間先是文簡移居會城恭先遂居會城會城中無不知有恭先

者未幾棄舉子一意訓其子嘗罄橐中金千里致名宿設講席於家不屑屑問家人產也萬厯丁酉科有柯許二生冒粵籍中式恭先率衆詣臺使者言粵中無此人遂削其籍有子十餘人登賢書者四懿萬厯癸酉憲觀賁丙午周閔壬子家學淵源稱極盛云吳效聖字集夫石灘人孝友篤行而治家勤儉狷直不爲阿私有司賓之成禮而退生平鮮至城郭鄉族謂之天民

黎臨惠字允仁慶隆舖人其父庠生某旣卒而後生事孀母承順惟謹母稍不懌必起敬恪立母色和然後

退處家最儉素惟母所嗜者則不憚多方曲致之生平直率與物無競於事多所退讓邑令

嘉其

行延之賓位每勉人以孝必稱黎孝子云子之奇克承父訓性端恪時邑方修學之奇掌理一切簿籍出納惟謹

吳守英字乾甫與弟世英事母陳氏至孝母年九十孀居者五十載奉養彌謹兄弟友愛老而弗衰俱給事公府當得官以親老弗願仕冠帶賓於鄉世英字俊甫有雋才工詩律大學士澱陽趙公尤重之台使者許大成表之曰秉憲者英年九十有六又有弟粹英

亦賓於鄉壽百歲邑令陸清源致粟帛題其楹曰瑞世期頤

梁勝任字少南謹厚愿樸而性最開敏喜閱方書囊中貯善藥濟人不受值隣有急者以告無不應妻孥匱乏弗計也年逾大耄林邑令明興旌之曰令德壽豈子善信

善信字從己有父風事親至孝雖食貧甘旨之供未嘗缺爲人深沉濶達市隱闐闐間而務敦古誼有士人風性嗜酒飲至數斗不亂或偶醉亦必慎言笑握拳甚謹有非禮之施置不校得老氏退一步法薄俗

胥化焉其子擎柱中甲午舉人報錄至善信方飲於其隣若無所聞者累觴盡歡迨暮始返其雅量多類此

湛功武字文濟沙貝人務篤行恥詭語因自號誠齋補郡學弟子員有雋聲有異母兄不能治生家漸落功武代爲經理先兄而後家畢身如一日也嘗爲其父創祠入主之夕夢父與其祖笠寤而占之曰笠所以禦兩祖未有祠先君命我也卽鳩工營祖祠比工竣復修曾祖祠凡親鄰之嫁娶喪葬或貧不能舉咸傾囊助之族中子弟有敏慧而貧者具修脯延名士爲之師俾就學君子曰功武孝於親友於兄弟而惠及族人焉可謂三善備矣孫廣德

廣德字君吉一字徐子四歲失父不待訓飭能自讀書勵行事母以孝聞田宅之美者皆讓之其兄而擇其僻陋者所衣取樸傲者曰吾樂是也急人之困甚于己待僕隸未嘗有疾言遽色人以爲有西漢篤行風子鳳光癸卯解元人以爲世德之報云

黃翼朱字茂行知縣文典孫也博覽羣籍下筆千言立就嘗與友人結廬鳳凰山欲近光於崔湛志甚遠而遇數奇七試弗售遂與二三知己彈琴賦詩以寄意

馬生平不負然諾不臧否人物所遇無老少皆折節禮之里中有以非意相加者置不校有婁師德唾面自乾之風三子皆有立而仲世徵尤有文名人咸以義方稱之

鄭大任字宏重聰老裔孫也聰老爲增名儒然家未有專祠大任與姪士璧經度大宗旁而建祠焉天性孝友而才猷甚敏練督修學宮時竹頭木屑皆得其理邑令陸清源重之生平尤好周卹尙尾村有謝確弘者逋富人錢索之急計無所出遂自沉於水大任曰易事耳何至此出之水中并與之金使償焉後確宏

死大任夢確宏來謁曰沐君之恩未報請俟庚午及庚午秋舉一子自是施濟益廣所見有匱乏者輒周之家居鶴嶺惟賦詩訓子無餘事崖州學博吳苧歌贈詩有欵枕風林偕鶴夢當門月影照魚簪之句所著有鶴嶺吟藏于家

湯際可者尙節概敦孝友周恤族黨靡不懇至少時母卒居喪哀毀骨立兄弟五人喪其四獨際可熒然一身伯仲均無子家業頗饒爲之立後得附祭於祠叔季雖有子皆幼稚爲之撫育以至成立未嘗以財自私從弟矩殤婦劉氏未婚而孀守不嫁際可周旋保

護亦爲之立後劉倚之如翁然爲人樸直公正督理學宮事有勞屢舉賓筵不赴士人請以冠帶榮之子廉有隱德不忝父風

黃亢宗爲文典會孫性孝友雍睦與物無競足跡不至公府而尤好行其德邑士人建鳳臺書院地狹隘限於方隅亢宗卽割所居地益之酬值不受邑令陸清源旌其門且授冠服焉宣城馮祖快來署邑事甚傾慕之及得代主於其子兆伸兆行之館造廬見必旦暮促膝乃歡贈詩有相水卽今新憲乞潁川猶見舊門風之句

黎會禮字克美天性孝友讀書知大義幼失父哭踊踰節事母最謹母有不樂侍立左右不敢動伺候顏色有笑容乃已事兄如父兄病肺手治湯藥不懈及兄病篤以父遺金百餘貽之禮不敢却益以私囊構屋與出繼弟英居焉處衆中不苟爲然諾而恂恂恭謹尤好施予有死而無主者會禮主之具槥殯殮甲申饑會禮罄所有周恤時邑令林明興勸賑有藉會禮名報者侯曰會禮之賑久矣余知之不待勸也及戊子又饑會禮以所食穀減價糶不能價者亦以多寡差各受穀去所存活甚衆早年艱子立族子蘭爲己

子已成立名在膠序後會禮年六十而卒遺腹生一子咸謂天道洵有知云

單養正字純學性最孝友嘗爲族正族人稟約束焉好義惟恐不及凶歲嘗率先賑卹至鄉之親而賢賢而弱者尤加意生平重然諾口無飾言遇事能含忍學道謙讓故無雀角鼠牙之事所尤難者山寇嘗蹂躪其鄉養正設奇買勇寇聞之皆退避去有保障功先是有商於鹽者積所贏數百金貯養正篋中及寇退家資罄盡獨商所貯數百金在竟還之學士稱詩贈焉邑大夫稱盛禮正賓席皆誦其高義云

徐應德字時美西洲人禮部儒士性樸行端謹事父母能孝叔早世無後應德成服執喪而不豔千金之產讓繼於待生之弟尤好施與每遇歉歲賑濟甚力稱貸者不能償輒裂其券而焚之舉鄉飲賓邑令表其門曰儒林耆碩

以上依前志

劉璲號北庄麻車人自始祖遷於麻車至璲已九世子孫蕃衍地隘不能容璲爲相宅於顯廠之區新建一坊其坊北向故自號北庄生有智術能創業家族之事諸賴維持形家之學古屬專門璲尤篤信其說鄉有竹子井水二岡夙稱善地乃稅置爲祖父兄弟塋

域又於水口基頭築土建廟以為坐鎮居人果能逢吉而科名始著人稱其獨得景純之秘焉

據采訪冊

陳培雲橋頭人里選鄉賓性和易鄉閭有事多賴排解老益怡情山水吟咏自樂年百有三歲卒有期頤詩老之目同族環江亦里選鄉賓性樸實老而益壯年百有二歲卒時稱人瑞焉

據采訪冊

湯衡號老圃鶴嶺舖人性喜林泉闢圃種植帶經而鋤隱居自適一日方灌園有行客二人經其地憇於道旁少頃去遺一布囊衡拾探之金也乃守候其人復至悉還之其隱德多類此永樂間舉鄉賓授恩官卒

年九十有五

據采訪冊

國朝

黃雄畧字燕盛南門寺前街人邑庠生勗學敦品以德化人設教五十餘年循循善誘信從者眾所館常十餘年主人猶不忍舍也生平尤篤友誼有邱仁風者山左清河廩生被譴來增見其品學可取命子合宮與遊不以在縲縶輕也邱卒謂子合宮曰生我館死我殯責無貸也汝亟圖之費無靳殮葬如式後十餘年邱氏子姪來尋得拾遺骸歸故里含淚叩謝又有羊城雷應洲者少相友善同入伍卒於增無期功親

雄畧亦買地葬之且令子孫歲時祭於其墓曰毋使
吾友之鬼餒而也至今世守其命情至義盡類如此
劉必振字聲玉麻車人性明敏好讀書因不得志於有
司隱居鄉井日以訓俗型方爲務里鄰有紛爭事輒
取決於振振一言重於九鼎康熙四十八年邑行清
田法沈令澄素重振舉爲鄉正以董其事事竣遺鏤
花雲石屏二坐爲酬勞之品焉據采訪冊
鄭璇字玉旋高賢舖人太學生天性孝友生平端嚴方
正而待人溫厚有兄沒無後爲割產立嗣居鄉族間
獎其善而誨其不及一時奉爲標準遇歲饑則盡出

其家之所積與貧乏共之有紛爭者璇出一語則立
解蓋德之感人如此有朝官朝爾岱者以丈城來增
一見器重之曰先生渾金璞玉人也因贈以號曰璞
齋顏其堂曰襟懷瀟灑晚年以詩禮訓子太史鄭際
泰題其別業曰敬義齋子采授州司馬紹聖及孫鍾
巒皆邑庠生曾孫俊歲貢生年八十二卒族人奉其
主祔祭於始祖祠

黎燮五慶隆舖人性恬淡而長厚樂善不倦訓子有義
方家貧躬耕力食以奉其母孝養備至其待人無厲
色皆薰陶而自化有橫逆亦不較鄉里皆稱道之以

子翰任徐聞學教諭贈修職郎

單光耀號林叟元洲村人樂善好施以財濟物修理橋道建築鄉祠凡有廢闕無不興舉邑令魏綰詳請旌之扁曰大義可風

湛上濟字爲楫學稷次子也補弟子員尋食餼肄業端溪粵秀兩院長楊纘緒何深咸目爲國士院試名噪嶺南舉歲貢有勸其入國子監肄業贈金爲營捐教職者辭曰窮達由命不可強也分產以撫弟之子女分子以繼兄嗣乾隆十六年薦饑有族某借荒歉倡賣祖蒸濟獨挺爭卒中止逆匪王亮臣滋事總督阿

駐兵沙貝濟諭鄉人無恐告大吏給符信派能子弟四出密偵導弁協擒賊次第就獲其有株連者抗身白憲力保全活數百人事寧復面陳大憲以新塘外洋內山請設守以靖伏莽大吏以疏聞始建游擊等官邑令管一清司其役嘗爲借箸甚賴之暮年猶篤學作勵志詩自警每典衣買書闢一園植香柚數十株環蒔芳蘭坐息其中著有環園集年六十八卒
覃恩貤贈文林郎其後一門簪紱極盛

吳驥字存義雅瑤人貲財頗厚生平守正不阿乾隆間鹽務限急江西南康上游二埠尤甚商人病之有廣

東督撫某 奏請舉廣東富戶充商遂因端滋擾召
 驢驢以無力實告憲示意株連驢獨緘口縲絏三年
 始終無易詞後得釋親友咸德之邑人姚愚山贈云
 鐵漢身經百鍊金人口用三緘後縣丞鄭某顏其庭
 曰和睦鄉鄰蓋嘉其慈良愷悌也

劉超達號聞遠麻車鄉人性勤儉慈良年越期頤一堂
 五代知縣毛具題乾隆壬寅奉 旨旌表 敕賜昇
 平人瑞坊額 恩賞上用龍緞二疋白金二十兩頂
 帶榮身壽終百有七歲二子俱太學生卒年俱九十
 餘孫揚清歲貢任廉州府訓導別有傳其孫會列成

均登賢序者共十八

單尙字勦南例貢生元洲人性孝友親在無私財親沒
 無墮行居鄉排解紛難好善樂施每歲歉卽倡率賑
 濟素以尊師教子爲急暇則寄情吟咏邑侯管品爲
 隱德君子贈以額曰川媚山輝又有聯云正物常思
 咨讜論敲詩隨意著嘉言其見重若此子觀獻守尙
 遺訓以勤儉裕家亦援例選明經常以民生之不易
 戒慎之不可怠爲子孫訓年八十有奇九子孫曾三
 十餘每見莫記其名子文駒以廩貢歷署肇慶高明
 陽春教諭其餘聲蜚膠庠名分列職者莫可悉紀人

以為尚之厚德開於先獻之善繼踵于後云

張麟字仁徵號愚邨梅都高埔人也性卓落好讀書毅然以古人自許數奇不售援例授明經奉親不離左右以經史課子弟倡建書院於雙鳳山傍請於有司設租以助膏火橫經者益眾時宣 聖訓以誨宗族併懇請大憲准除優免邑人賴之

黃鶴鳴字粹亭號松皋國學生少失怙與兄繩憲同稟母教憲好吟咏詩稿盈篋鳴相為埧篋唱和數十年門內怡怡也生平好施與歲歉恒量力周恤外舅失傳為捐貲置嗣婚娶房屋皆力任焉尤好延師以課

子姪終歲誦聲繞壁長子應桂以癸卯領鄉薦歷署直隸知縣次應梅授明經孫起鶚起鵬騰聲璧泮皆鳴之報也

林浦珠字耀川高桂人邑諸生九皋季子授布政司理問性嚴厲待物以謙甫冠父沒竭誠事母至老孺慕叔與二兄失傳出囊咸為立嗣戚族以婚葬求恤者務量力以應讀書志未遂延師督課子孫歲無暇日祖墓祠宇每捐金修之邑紳構復鳳山書院及城西月門始終勦事肩任其勞子嘉桂嘉譽遊於庠嘉學入太學孫樹藩郡諸生樹儀成進士人稱厚德之報

劉發祿字天寵貢生麻車人父廷試邑庠生品端學粹祿善承庭訓友愛昆弟諸姪少失怙撫之如已子訓誨均底成立素嗜學手輯先儒言行之鞭辟入己者時爲諸子姪解說尤凜大義能任事喜調恤恒不令人知會城忠昭公祠將圯咸以修復爲艱祿力肩其任卒落成生母父黃某無子鮮強近親既沒遺之祭費耐於其祖族某貧老子喪遺孫子且穉苦寒餒將鬻諸人祿聞亟止之曰公耄矣僅遺此孤棄之若後嗣何乃育於家又某謀爲亡姪立嗣罄懸無藉請於祿助以金比長受室悼祿之不及見也備觴豆來奠泫睫道故祿家始知其事其隱德多類此與鄉人處溫然如春風而守正不阿環族數千人每論事聞其言輒首肯族因以益睦嘉慶甲戌邑令廉知其名白制府授黨正堅不就長子元美官乳源縣教諭後人皆務學有長厚風

賴怡字藹衷賢都臘圃鄉人例授明經富而好善廣積蒸田祖孫均受其庇每假因果之說以導世嘗曰吾非佞佛求福聞之佛者覺也任聖以先覺覺民如來亦以先覺覺世雖所覺之道不同而與人爲善則一也且佛言因果卽吾儒言吉凶伊訓惟吉凶不僭在

人惟天降災祥在德異言同旨人能奉行卽聖賢矣
遇事必持正婉轉勸諭樂從而止其捐租入報德寺
創建張村石橋登砌本村石路皆本利物濟人之心
而發後得制憲吳邑侯閻舉鄉飲正賓旌以額曰經
明行高子張烈附貢能承先志孫曾林立多列鬢序
實怡隱德所致云

以上依前志

劉世隆慶都浸木潭村人本梅州產年十二隨族人來
增尋父至則父已歿因落拓爲傭性勤慎儲蓄十餘
年乃立家室置田廬開基於浸木潭後累貲至數千
金嘗措款建厚貽書舍延師教其鄉若鄰之子弟并

附夜課月課以便尤貧不能卒學者比閭間竟漸染
而知文化子三長公仁次侯仁次伯仁皆成文學士
孫贊叁乾隆丙辰 恩貢學問淵博詩賦詞俱工雅
爲時文尤有大家規範每學使者歲科試諸生見其
文輒加獎譽從無落置第三人故文名噪一時焉

梁顯仁賢都鄧山人家小康而勇於爲善嘗獨力開闢
石排瀝大路一段由圖田水口至浸木潭凡十里許
化險爲夷費金數百子衡陽邑附生孫濟龍歲貢曾
孫天喜克承祖訓樂善不倦施棺木修橋梁汲汲以
爲事業附近由牛寮達蕉田一路延袤十餘里昔本

崎嶇天喜添補砌築工逾數月費亦不貲遂成坦途
行旅感激卒年八十餘歲子孫繁盛親見生下男婦
百八十有奇

陳宏亮大步口村人性忍耐能自立年十二由惠州長
寧子身抵增茹苦含辛年逾三十始娶妻鄭氏創基
於大步口馬好種植開墾荒蕪夜以繼日所有林木
果實皆手自栽培至老不倦尤好興學自建步雲學
舍延師教育子弟多所成就年九十六卒

陳文渠號聖廣坳頭村人性慈善好施與乾隆末年歲
饑嘗發粟賑濟存活甚衆縣文武官僚高其義會八

十壽辰乃聯同製錦祝嘏季子超楊孫業華皆有聲
庠序業華尤克繩祖武里汾村邊一水爲福和來往
派潭所必經春夏雨多漲急人苦病涉業華首捐鉅
資倡建石橋十丈許行旅便之道光間強丐結黨橫
索鄉落間稍拂卽嫁禍肆噬受害者衆業華首陳於
縣厲其禁并集資積一福成烝以爲後盾懲前毖後
意美法良今邑人冠婚喪祭等事無復有強丐之擾
者業華之力爲多夫坳頭在萬山之中文渠之後代
有達人固其秀靈之鍾毓亦其明德之詒謀也

劉元伯字愷庭麻車人性恬靜寡言笑節嗜欲善爲養

增城縣志 卷二十二
生之學閒居無事輒焚香煮茗讀易自娛晚年尤喜
與兒童談故事以爲笑樂兀坐竟日無倦容道光壬
寅間壽逾百歲矣有司以聞於朝 賜昇平人瑞匾
額建坊旌表並給庫緞二疋白金二錠子鉦國學生
孫連登 恩貢以學行顯於時
賴忠國字晉夫號存救臘埔人郡庠生壽官修職郎寅
衷四子爲學貫通羣籍祖春湖家廟燼於流寇倡捐
重建規復祀產性謙厚好施與重然諾善爲人排難
解紛澤被鄉邑卒年八十五子元寵孫洙泗廷拔曾
孫大韶致廣俱有聲黌序

陳冠華雲都深陂人縣學附生敦品勸學鄉居授徒善
於誘掖晚辦鄉團勇敢能任事縣屬差役多藉催科
貽害糧戶卽清白之家賦役早完亦必以虛戶積欠
嫁名擾累肆所勒索邑人苦之冠華陳諸縣令張星
耀護其所屬反以刁健扛訟斥冠華不爲理冠華轉
控諸大吏大吏廉其實乃奪令職置諸役於法積年
弊害永得蠲除邑人至今賴之

湯成鍾字鏞軒龜峯舖人性慈厚有度量勤儉致富族
中貧戶積欠國課數百金追呼甚急成鍾代爲完納
無少吝嘗有佃戶負其租貧不能償慮受逼責歲暮

懷毒至欲畢命其家迨見成鍾告之窘成鍾緩其債更遺以金資其度歲佃感激流涕竟以來意告之相與詫訝其待人雅量類此者甚多故鄰里鄉黨識與不識皆以長厚稱之子佐清邑武生孫定祥花翎侍衛定揚武舉

馬明德字世驥西瓜嶺人學行純篤尤敦孝友父聯高嘗患日疾晨起輒舐之尋愈家饒裕好行其德居恆以興學育才爲己任所居鄉僻人多服農風氣閉塞因捐資創設西溪學塾延名師教其鄉之子弟子弟讀書識字者日益多邑中建同文義學力助其成村

後有仙村往來縣城孔道中隔一水爲捐貲建石橋通之人免病涉咸豐四年因盜劫驚悸卒年四十六父母尙在以養生送死未畢大事遺囑以素服殮并附衰麻於棺曰將爲他日守制泉下以彌缺憾其孝思如此生平律己至嚴治家尤有法度子九人皆有所成就長廷獻同知銜次廷輔縣丞銜溥謙優增生廷傑例貢生毓霖同知銜耀熊武生汝槐附貢生廷彪千總銜毓棠州同銜孫三十七人慶麟優廩生法政學堂畢業獎副貢以州判用顯鋆增生景鎔附貢生顯鎔渭璜衍鑾均縣學附生慶鑾衍鑿郡學附生

曾孫逾五十人門族之盛爲鄉里冠

潘嘉謨塘下人性朴厚年八十四時五代同堂有司以聞於朝賞七葉衍祥坊額龍緞一疋白金二十一兩兄弟六人皆壽考且皆得終養其親年九十一卒服屬子姪百八十餘人一時稱盛

賴廷幹號森園臘圃人邑武生初本習文學尋棄而就武孝行最純篤母嘗患癩癩疾十餘年飲食湯藥必躬親爲役不以委婢僕輩生平慎言行重然諾爲鄉人推重有紛爭者一二語輒折服尤尊師重道教育子弟多有所成就仲子應揚季子紹輝皆有聲庠序

咸豐甲寅紅寇掠境倡捐重資築墻浚濠護其鄉免蹂躪年八十餘精神矍鑠孫炳琳炳輝曾孫慎徽相繼游泮食餼皆及見之

朱應時字捷儀號敏之朱村人性敦厚喜恬靜中年嘗隱居羅浮以避塵囂尋歸主家政居積致富友愛至篤有猶子五人皆少孤撫如己子教養成立里有舊設義學日久廢弛力爲整頓悉復原狀年七十八無疾而終親疏服屬至數百人邑里稱盛兄子占春同治壬戌恩科武舉會試考取兵部差官長子聯芳邑武生

朱迎朱村人字敏謙號禮門授布政司理問銜性孝友喜調恤咸豐初歲饑米貴設法平糶鄉里多賴之年六十時父次漁嘗患痢疾迎侍奉湯藥衣不解帶者年餘有伯祖失傳爲撥產立嗣以承其後其他救災恤鄰一切仗義急公之事莫不樂爲肩任蓋一鄉之善士也子定康武生定安 恩貢生孫樹藩附貢生朱容魏字達彰朱村人守備銜精形勢家學然未嘗挾術自售爲人崇實尙善好爲公益倡修橋路祠廟甚多光緒四年在本鄉倡立一愛善堂集欸生息爲施濟費後儲積日厚凡修橋砌路施棺捨藥及其他一切善舉皆可以息金供應歲費數十乃至數百以爲常如由朱村至神岡墟石路卽愛善堂息欸所砌也劉纘光字永久麻車人性聰慧博學能文書法趙承旨弱冠補弟子員督學使白鎔深器重之纘光席先世遺產困粟充物然不屑與鄉曲競刀錐之末其出耀也恆不逐時值但必俟青黃不接之交以備緩急之所需要歲以爲常生平詩酒自娛與人交藹然和易撫弱弟起龍尤友愛弟病瘵卒哀毀逾度子五人藥附貢生候選州判工書法臨靈飛經得其神似孫昂

樞附貢生

黎斗貴慶隆舖人少失怙與兄力田奉母色養兼盡雖各長子孫不忍析爨有舊識韓某利其有穴牆圖竊斗貴覺呼羣起執獲燭之韓也憐其貧予以金釋之去韓愧勵改過務正業卒成中人產常舉以告人而斗貴則始終爲諱生平尤重師儒年八十餘每子姪自塾歸必諄諄勸勉孫曾多務學植品著於鄉里縣令杜森寶以忠厚流風字表其門子懿康善繼父志著有仿古詩鈔二卷孫朝傑任長樂縣學訓導有傳王獻書字史軒秋風坳人父德元慷慨好施與見邑之證果坳山徑崎嶇綿亘數里擬築亭施茗以惠行道

功未竟而卒遺囑獻書踵成之故名其亭曰濟飲曰述志紀實也復將山路砌以平石旁植樹木置田產以爲常費人皆德之咸豐四年紅匪亂獻書於其鄉設太平新社籌辦團練匪不敢犯團紳陳維嶽收復縣城時獻書率團勇會之論功獎軍功六品

賴鳳字啟均號嵩山羅逕口人國子生性沈毅鄉居好行方便事逕心田暨羅逕內境石橋證果洞石路皆其所建築嘗闢羅逕坳山路阻巨石鑿之三年工乃竣費雖鉅不顧也每遇道路破壞卽農忙亦必率工修理心始安子從龍邑增生好行方便亦有父風遞

年八月必僱工修路一次父遺有稅山二所便種植
涎之者重價不可得後有賴復新請以石砌其父所
獨闢之路以抵山價慨允之其善體親志如此

潘學古字定鑑塘下人性嚴毅意懇摯發言卽欲箴砭
世俗月朔輒集族人講陳文恭公訓俗遺規道光二
十年英人犯廣州土匪乘機竊發學古助堂兄學勝
聯合鄉鄰團練守禦境賴以寧咸豐四年紅匪陷縣
城襲擊橋頭村學古偕子武生永祥督率鄉團赴援
賊潰退城南一方倚爲保障尋督勇隨團紳陳維嶽
收復縣城守護南門論功獎軍功六品援例授直隸

州同三子文炳附貢生

劉榮光號瑞堂本燈心裕人移居鍾嶽村二歲失怙母
李守節撫育零丁孤苦至於成立性孝而敏讀書明
大義因奉母謀養贍遂輟業居積致鉅富尙義俠疏
財賄家有田產數千畝賃耕者隨歲豐歉增損租值
不稍強索臨終舉積年債券悉焚之棄債至二萬餘
金年七十歲卒子儀修同知銜次家修教職梅修邑
武生晉都司銜孫清源邑武生璇源邑附生璇藥廩
貢生納資爲知縣分發廣西歷攝陽朔灌陽縣養利
州事所至皆有政聲燮輝邑廩生榮光以子孫官位

封贈各如其秩

陳恭字成欽都田人性仁孝篤孺慕恭庶出生母吳早卒事嫡母劉以孝聞劉嘗病劇氣垂絕恭以口緊咀其口氣乃續得復蘇有姊貧甚年設養贍穀以終其身每遇歲饑賑濟貧乏無德色有鄰鄉張某主族私鬪鄉人排解已窮於術恭一日假他事強邀到家留之宿徹夜晤談絕不涉張族私鬪事惟召子姪輩至前宣講篤宗族和鄉黨大旨詰旦張興辭去詰曰如是俛俛毋乃指揮鬪事乎張赧然曰閱牆之行當速阻耳其勸人自化多類此四子鑑清附貢生援例授

訓導仁孝樂善有父風於聖人神道設教之意信之尤篤太上感應篇朝夕講誦老而不倦孫流芳流柱曾孫占鼈俱邑庠生

劉聲揚字大鳴麻車人以商業致富性篤孝友從父統爵貧老無子爲撥產立嗣教養婚娶皆自任之所親有貧者授田與耕不取租值村外有孔道雨後每苦沮洳爲購石悉砌之寒畯士或以貧故輟讀輒資之使卒業成就甚衆嘗以事詣省會時權使某縱家人違法苛斂下至蔬蕨之屬無漏脫市人相率罷業伺權使出指輿不使前勢洶洶聲揚覩狀急往諭衆曰

此或椽吏翫法寧必上官意耶果非理當狀訴如此是爲亂也毋自取戾衆乃散權使亦寢其事其應變之才多類此晚援例爲按察司經歷年六十卒子澤鎰邑附生葆鋆郡庠生葆廉國學生以辦滇捐出力獎同知銜

陳貫經字英泰號覺初國學生大步口人性方嚴不苟取與居恆無疾言無遽色旦夕端坐身不偏倚舉族化之子婦不聞嘻嗃聲頗有幹畧里社保衛之事皆力任之子見龍附貢生亦喜任事有父風縣屬門閭差役藉勢病民久爲害見龍憤欲除之奔走呼號卒

得集合全邑士紳公推劉承恩領首請於大吏嚴厲禁革勒石豎於縣署門右此舉尤爲鄉人所推重劉佩蓉號秋裳麻車人三歲而孤事母以孝聞由廩膳生納粟爲訓導尋以襄辦縣城考棚成以原職記功超委佩蓉之援例入官也冀以榮銜封贈父母故始終未嘗一供職事無所營也家富藏籍工楷法尤善擘窠大書子承志亦以附貢生援例授訓導能繼其業善居室喜藝園圍當門叢桂夾道水木清華望而知爲高人宅舍也

何纘龍字錫田本亭子岡人遷居蛇頭嶺家饒於財性


長城縣志 卷二十二
慷慨嘗於菴前約建築灘頭石橋凡三門高及丈費
至千金獨力任之不少吝咸豐四年紅匪陷縣城四
鄉皆患盜纘龍聯約辦團保衛自肩餉精匪黨黎亞
魁玲瓏壺等圍劫涵塘村纘龍親督團勇與約紳吳
大邦赴援大破賊陣斬獲甚衆時團紳陳維嶽謀復
縣城纘龍亦率鄉勇會之事平以功獲獎軍功六品
王兆熊字夢軒證果洋人家素貧勤儉居積漸致饒裕
能識大體於興學一事尤所踴躍東山義學之建賴
其資力爲多弟兆鴻鴻子國璜附貢生均以樂善稱
於鄉



朱秉庸字禹勳朱村人性篤孝樂善母氏年老目昏秉
庸晨夕定省靡或缺失自飲食杖履以至寢興便溺
皆躬親其役不假手子婦婢僕居恆頃刻弗離左右
遇親友慶吊雖暮必歸不令門閭苦倚族黨稱其孝
翕然無閒言凡遇善舉必竭力資助鄉間橋路多其
捐建尤著者爲咸豐十年創集貧民長壽會人不過
日出一錢使極貧者亦易措手積銖累寸課息計贏
逐漸增長今已蓄成巨資置立厚產凡隸會中子孫
男婦一聞殂謝會卽賻欸由是終者掩藏送死者可
無遺憾皆秉庸獨力所成者也子桂榮 恩貢生就

職州判尋告近政府經歷分發本省試用孫澤墀縣
學附生

劉秉寬字宏衷號如谷麻車人由附貢生援例爲府同
知少讀書明大義家素裕好施與尤善爲人排解紛
爭光緒十四年縣修文廟秉寬始終其事縣令陳
召棠雅重之任以邑總局事鉅細咸理繼宰是邑者
多倚重焉子汝鎰邑附生

增城縣志卷之二十二終





400.1
+1
+5.9

